

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI RABU : 4 DISEMBER 2019

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' MANSOR OTHMAN
[NIBONG TEBAL]**

TARIKH : 4 DISEMBER 2019 (RABU)

SOALAN NO.1

Minta **MENTERI AIR, TANAH DAN SUMBER ASLI** menyatakan sejauh manakah usaha kerajaan bagi menggabungkan bil bekalan air dengan bil pembetulan Indah Water Konsortium (IWK). Apa kesannya kepada Kerajaan dan juga rakyat.

JAWAPAN

Tuan Yang di-Pertua,

1. Pelaksanaan Projek Perintis Bil Bersepadu telah dilaksanakan di Wilayah Persekutuan Labuan berkuatkuasa pada 1 Mac 2016 di mana bil bersepadu pertama telah dikeluarkan pada 1 April 2016. Pelaksanaan projek ini telah menunjukkan kesan yang positif di mana terdapat peningkatan dalam kadar kutipan kumulatif Indah Water Konsortium Sdn Bhd (IWK) di Labuan iaitu dari 87.0 peratus pada tahun 2016 kepada 90.4 peratus pada tahun 2018. Pelaksanaan bil bersepadu ini juga turut memberi kesan positif terhadap hasil kutipan bil Jabatan Bekalan Air Labuan (JBAL) iaitu peningkatan sebanyak 2% dari RM33.11 juta pada tahun 2016 kepada RM33.82 juta pada tahun 2018.
2. Selepas pelaksanaan pengebilan bersepadu di Labuan, IWK berusaha, bersama dengan sokongan dari Kementerian Air, Tanah dan Sumber Asli (KATS), memperluaskan lagi pelaksanaan pengebilan bersepadu kepada negeri-negeri lain dengan mengadakan perbincangan bersama operator-operator bekalan air negeri. Beberapa operator bekalan air negeri telah memberi maklum balas positif berkenaan pelaksanaan pengebilan bersepadu dengan IWK. Walau bagaimanapun, pelaksanaan ini adalah tertakluk kepada kelulusan dan persetujuan Kerajaan Negeri.

3. Untuk makluman, pelaksanaan pengebilan bersepadu tidak melibatkan kenaikan tarif perkhidmatan pemetungan sedia ada. Pelaksanaan pengebilan bersepadu dapat memudahkan proses pembayaran di mana pelanggan menerima dan membayar satu bil untuk kedua-dua perkhidmatan bekalan air dan pemetungan sekaligus. Selain itu, pelanggan hanya perlu menghubungi satu pusat hubungan sekiranya pelanggan mempunyai sebarang pertanyaan atau aduan berkenaan bil kerana terdapat kakitangan pihak IWK yang akan berada di Pejabat Pembekal Air. Pelanggan tidak perlu lagi menghubungi talian yang berlainan untuk isu perkhidmatan bekalan air dan perkhidmatan pemetungan.
4. Selain itu, pelaksanaan pengebilan bersepadu juga boleh membantu rakyat untuk bersiap sedia menghadapi perubahan yang melibatkan integrasi antara perkhidmatan bekalan air dan perkhidmatan pemetungan yang merupakan hala tuju industri perkhidmatan air negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : TUAN HAJI AWANG BIN HASHIM [PENDANG]
TARIKH : 4 DISEMBER 2019 (RABU)

SOALAN

Minta **PERDANA MENTERI** menyatakan:-

- a) apakah perancangan Kerajaan untuk meningkatkan peranan JAKIM bagi menjaga kepentingan umat Islam dalam pensijilan halal produk makanan; dan
- b) adakah Kerajaan bersedia membantu mempromosi Kempen Buy Muslim First (BMF) yang telah disalah anggap sebagai gerakan memboikot produk kaum lain.

**JAWAPAN : (YB TIMBALAN MENTERI DI JABATAN PERDANA
MENTERI)**

Tuan Yang di-Pertua,

Soalan (a)

Untuk makluman Ahli Yang Berhormat, Kabinet telah memutuskan pada 18 September 2019 bahawa Majlis Halal Malaysia telah dijenamakan semula kepada Majlis Pembangunan Industri Halal di mana JAKIM bukan lagi bertindak sebagai sekretariat. Sebaliknya JAKIM bertanggungjawab kepada bidang teknikal dalam ekosistem halal yang merangkumi aspek:

- (i) Pensijilan dan integriti pensijilan
- (ii) Akreditasi
- (iii) Regulatori
- (iv) Latihan

NO. SOALAN : 2

Kerajaan telahpun mewujudkan pelbagai inisiatif dan perancangan untuk meningkatkan peranan JAKIM dalam bidang teknikal ini bagi menjaga kepentingan umat Islam dalam pensijilan halal produk makanan dan perkhidmatan. Antaranya adalah melalui:

- (i) Dalam bidang akreditasi, regulatori dan pensijilan- **Penubuhan International Halal Authority Board (IHAB)**. IHAB yang dianggotai oleh pihak berkuasa dan badan pensijilan halal dari 45 buah negara mampu menggerakkan matlamat ke arah penyeragaman dan pengharmonian proses pelaksanaan pensijilan halal di kebanyakan negara di dunia. IHAB akan menjadi platform dalam mengukuhkan kedudukan Malaysia sebagai peneraju halal global melalui pelaksanaan pengiktirafan pihak berkuasa dan badan pensijilan halal luar negara. Sehingga 3 Disember 2019 JAKIM telah mengiktiraf 78 buah badan pensijilan halal dari 45 buah negara. Pengiktirafan diberikan berasaskan kepada pematuhan dan pelaksanaan piawaian halal yang menepati ciri-ciri dan model Malaysia. Secara tidak langsung pengiktirafan ini menjadi mekanisme penyelarasan di peringkat antarabangsa di mana Badan-badan Pensijilan Halal ini perlu menerima standard dan piawaian Halal Malaysia. Mesyuarat Agung IHAB pada 1 April 2019 yang lalu telah melantik Malaysia sebagai Pengerusi dan Setiausaha Agung IHAB bagi penggal 2019-2021.
- (ii) Dalam bidang pensijilan dan integriti pensijilan, regulatori dan latihan - **Penubuhan Institut Halal Malaysia (IHM)**. IHM dibangunkan secara berperingkat-peringkat di atas tanah berkeluasan 45 ekar di Bandar Enstek, Negeri Sembilan. Pembangunan fizikal IHM adalah berdasarkan peruntukan di bawah RMK-10, RMK-11 dan RMK-12. IHM akan mengandungi pusat-pusat seperti berikut:
 - (a) Pusat Analisis Halal Malaysia atau pun **Malaysia Halal Analysis Centre (MyHAC)**. Dibina di bawah peruntukan RMK-10 dan telah mula beroperasi pada Oktober 2015. MyHAC merupakan makmal analisis halal yang dikendalikan di bawah JAKIM dengan Juru Analisis terdiri daripada Pegawai Teknologi Makanan dan Pegawai Sains yang merupakan kader dari Kementerian Kesihatan dan

NO. SOALAN : 2

Jabatan Kimia Malaysia. Pusat ini akan meletakkan Malaysia terkehadapan dengan keupayaan saintifik dalam mengukuhkan pensijilan halal dan meningkatkan keyakinan pengguna;

- (b) **Gudang Eksibit Halal** akan dibina di bawah RMK-11 dan mula dibina pada tahun 2020. Pembinaan gudang ini akan mengukuh dan memperkasa aktiviti pemantauan dan penguatkuasaan pensijilan halal. Ini kerana fasiliti ini akan menjadi pusat operasi pemantauan dan penguatkuasaan halal;
- (c) **Pusat Latihan Halal dan Pusat Penyelidikan dan Pembangunan Halal** akan dipohon di bawah RMK-12. Pusat ini akan menjadi tempat menjalankan latihan untuk auditor halal, tenaga pengajar halal dan badan-badan pensijilan halal. Manakala Pusat Penyelidikan dan Pembangunan Halal akan berfungsi menjalankan kajian-kajian berkaitan pengukuhan dan pemerkasaan pensijilan halal dan penggunaan teknologi dan inovasi dalam penghasilan produk halal.

Dalam bidang latihan juga, pada tahun 2016 JAKIM telah menubuhkan Halal Profesional Board (HPB) sebagai badan pengawal kepada Pusat Latihan dan Tenaga Pengajar Halal. Sekarang ini JAKIM mendaftarkan sebanyak 32 Penyedia Latihan Halal dan 250 tenaga pengajar halal. HPB juga telah mengeluarkan 2 modul latihan iaitu Eksekutif Halal Bertauliah dan Juru Audit Halal Dalam Bertauliah.

- (iii) Dalam bidang pensijilan dan integriti pensijilan Mendapatkan **akreditasi ISO/IEC 17065 (Conformity Assessment – Requirements for Bodies Certifying Products, Process and Services)** sebagai sebuah badan pensijilan halal, ianya penting bagi mewujudkan sistem pengurusan kualiti dalam pensijilan halal yang sistematik dan berintegriti bagi memberikan perkhidmatan yang terbaik serta memenuhi keperluan pelanggan. Melalui pengiktirafan ini juga sijil halal

NO. SOALAN : 2

Malaysia akan mendapat lebih banyak pengiktirafan dan membantu dalam aktiviti perdagangan.

Tuan Yang di-Pertua,

Soalan (b)

1. Untuk makluman Yang Berhormat, Kerajaan sentiasa menjaga kepentingan pelbagai pihak dan kumpulan dalam negara ini. Sebarang usaha memboikot atau menidakkan hak dan peluang pihak lain tidak sepatutnya berlaku. Oleh itu Kerajaan menggalakkan Buy Malaysian First yang mengutamakan produk dan perkhidmatan halal tempatan.

2. Penekanan adalah lebih kepada konsep halalan toyyiban yang diberi tumpuan dalam pensijilan halal meliputi semua aspek termasuk dari bahan ramuan, proses penyediaan, kesucian peralatan, kebersihan premis serta pengendalian yang mementingkan pematuhan Syariah, keselamatan, kualiti dan jaminan integriti sesuatu produk atau perkhidmatan.

3. Perlu diingat bahawa di sebalik industri halal yang dijalankan oleh usahawan bukan Islam terdapat ramai pekerja Muslim yang bergantung harap dan mencari rezeki. Sekiranya berlaku sesuatu pada syarikat boleh menjejaskan mereka juga.

4. Selain itu Mesyuarat Post-Kabinet Agensi-agensi Agama telah bersetuju supaya agensi-agensi agama membantu mempromosi produk-produk halal yang diusahakan oleh usahawan Muslim.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB TUAN KHAIRY JAMALUDDIN
[REMBAU]

TARIKH : 04 DISEMBER 2019

SOALAN

Minta **MENTERI SUMBER MANUSIA** menyatakan apakah bentuk kawalan institusi Pendidikan dan Latihan Teknikal dan Vokasional (TVET) terutamanya milikan swasta agar jumlah dan kualiti lulusan adalah sepadan dengan permintaan serta perkembangan teknologi sesebuah industri yang seterusnya dapat mengatasi masalah lambakan sesuatu lulusan dalam pasaran pekerjaan.

JAWAPAN

Tuan Yang di-Pertua,

1. Kerajaan melalui Jabatan Pembangunan Kemahiran (JPK) menguatkuasakan Akta Pembangunan Kemahiran Kebangsaan 2006 (Akta 652) dan mensyaratkan mana-mana penyedia latihan kemahiran hendaklah memohon kepada Jabatan Pembangunan Kemahiran (JPK), di bawah Kementerian Sumber Manusia (KSM) untuk diluluskan sebagai program bertauliah yang memenuhi kehendak Standard Kemahiran Pekerjaan Kebangsaan (NOSS). Ini bagi memastikan, setiap program latihan yang dilaksanakan memenuhi polisi dan tatacara jaminan kualiti yang telah ditetapkan.

SOALAN NO : 4

2. Kementerian ini melalui Jabatan Pembangunan Kemahiran akan menamatkan pentauliah program mana-mana penyedia latihan yang melanggar peraturan atau tidak mengekalkan kualiti yang sepatutnya. Setakat ini lebih daripada 200 pusat bertauliah telah ditamatkan tauliah kerana melanggar syarat-syarat yang ditetapkan.
3. Bagi memastikan jumlah dan kualiti lulusan sepadan dengan permintaan serta perkembangan teknologi sesebuah industri, JPK turut melantik tiga puluh (30) Badan Peneraju Industri (*Industry Lead Body* – ILB) yang bertanggungjawab melaksanakan kajian bagi mengenal pasti corak (*trend*) penawaran dan permintaan (*supply vs demand*), *emerging technologies*, kapasiti peluang pekerjaan (*job creation*) dan peningkatan kerjaya (*job enrichment*) serta membangun dan mengkaji semula dokumen Standard Kemahiran Pekerjaan Kebangsaan (NOSS) atau Standard Kompetensi Kebangsaan (NCS) sehingga mendapatkan kelulusan dari Majlis Pembangunan Kemahiran Kebangsaan (MPKK) bagi sektor industri berkaitan.
4. Selain itu, bagi memastikan kualiti latihan di pusat-pusat bertauliah sentiasa di tahap yang optimum, JPK telah memperkenalkan Program Penarafan Bintang yang diadakan sekali setiap dua tahun bagi program-program TVET yang dilaksanakan di pusat-pusat bertauliah awam dan swasta di bawah JPK.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS DEWAN RAKYAT

PERTANYAAN : LISAN

DARIPADA : DATO' DR. NORAINI AHMAD [PARIT SULONG]

TARIKH : 4 DISEMBER 2019 (KHAMIS)

SOALAN

DATO' DR. NORAINI AHMAD [PARIT SULONG] minta **MENTERI INDUSTRI UTAMA** menyatakan sejauh manakah keyakinan Kerajaan dalam memfailkan kes diskriminasi sawit negara ke Pertubuhan Perdagangan Dunia (WTO) akan memihak kepada Malaysia dan apakah pelan kontingensi yang direncana oleh Kementerian sekiranya langkah ini gagal.

JAWAPAN

Tuan Yang Di-Pertua,

Untuk makluman Ahli-Ahli Yang Berhormat, *Delegated Regulation* iaitu peraturan pelengkap di bawah *European Union Renewable Energy Directive II* (EU RED II) telah diterima dan diperaku serta diterbitkan dalam jurnal rasmi oleh pihak EU pada 21 Mei 2019. Akta atau peraturan ini adalah satu akta yang menerangkan antara lain mengenai kriteria atau metodologi bagi menentukan sama ada sumber dalam pengeluaran biobahan api menyebabkan kadar *indirect land use change* (ILUC) yang tinggi atau rendah dan kesannya kepada pelepasan gas rumah hijau.

Dalam hal ini, berdasarkan kepada *Delegated Regulation* tersebut, minyak sawit telah dikategorikan sebagai mempunyai kadar ILUC yang tinggi. Oleh itu, bermula pada Julai 2021, jumlah eksport minyak sawit negara akan dihadkan pada tahap dan nilai penggunaan bagi tahun 2019. Dan seterusnya akan dikeluarkan sepenuhnya daripada sumber biobahan api di EU bermula pada tahun 2030 sekiranya masih dikategorikan sebagai mempunyai kadar ILUC yang tinggi selepas semakan semula pada tahun 2021.

SOALAN NO : 6

Berdasarkan analisis, *Delegated Regulation* di bawah EU RED II dilihat mempunyai kekurangan dari segi ketelusan, kredibiliti saintifik dan terdapat banyak andaian yang dibuat memberikan gambaran yang tidak tepat terhadap amalan kemampanan yang dipraktikkan dalam industri sawit negara. Selain itu, ia juga dilihat berat sebelah apabila hanya minyak sawit dikategorikan sebagai mempunyai kadar risiko ILUC yang tinggi dalam kalangan minyak yang lain bagi sumber kepada bio bahan api. Tindakan ini telah mewujudkan sekatan yang tidak sewajarnya ke atas usaha kemampanan yang telah dan sedang dilaksanakan oleh Malaysia serta seterusnya menyekat amalan perdagangan bebas.

Tuan Yang Di-Pertua,

Mengambil kira kepentingan industri sawit kepada negara termasuk pembangunan sosio-ekonomi lebih 3 juta rakyat Malaysia yang terlibat dengan industri sawit, Kerajaan berpandangan adalah wajar untuk Malaysia mengambil tindakan yang lebih tegas terhadap EU yang dilihat mendiskriminasi negara pengeluar minyak sawit. Berdasarkan kepada semakan dan penilaian awal, polisi yang dinyatakan dalam *Delegated Regulation* di bawah EU RED II tersebut didapati telah melanggar prinsip-prinsip Pertubuhan Perdagangan Dunia (WTO) di bawah *General Agreement on Tariff and Trade (GATT)* 1994 dan *Agreement on Technical Barriers to Trade (TBT)*. Dalam hal ini, Malaysia dilihat mempunyai asas untuk mencabar EU melalui badan penyelesaian pertikaian (*Dispute Settlement Body*) di bawah WTO.

Dalam hal ini, Kementerian kini sedang bekerjasama dengan Jabatan Peguam Negara, Kementerian Perdagangan Antarabangsa dan Industri dan Kementerian Luar Negeri untuk meneliti perkara tersebut dan seterusnya menyediakan kertas perundangan sewajarnya.

Tuan Yang Di-Pertua,

Kementerian sememangnya sudah bersedia dan mempunyai beberapa strategi lain serta memastikan langkah di atas terlaksana dengan sewajarnya. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : DATO' SRI DR. SANTHARA [SEGAMAT]

TARIKH : 4 DISEMBER 2019 (SELASA)

SOALAN NO. 7

minta **PERDANA MENTERI** menyatakan bagaimana Malaysia merancang untuk mewujudkan perpaduan antara kaum dengan lebih erat. Apakah strategi dan langkah taktikal yang telah diambil.

JAWAPAN : YB SENATOR TUAN WAYTHA MOORTHY A/L PONNUSAMY, MENTERI DI JABATAN PERDANA MENTERI (PERPADUAN NEGARA DAN KESEJAHTERAAN SOSIAL)

Yang di-Pertua,

Jabatan Perpaduan Negara dan Integrasi Nasional dari masa ke semasa sentiasa merancang strategi dan inisiatif tertentu melalui pelan strategik Jabatan bagi terus memelihara dan mengekalkan keharmonian dan perpaduan antara masyarakat berbilang kaum di negara ini. Antara strategi dan inisiatif yang dilaksanakan adalah seperti berikut:

- (i) menubuhkan Majlis Perundingan Keharmonian Rakyat (MPKR) di mana ianya akan menjadi satu platform ke arah penyatuan nasional (*national reconcilliation*) bagi mengurangkan polarisasi kaum dan membina bangsa Malaysia yang bersatu padu. Penubuhannya adalah untuk membincangkan isu-isu sukar dalam kalangan masyarakat Malaysia yang kompleks serta merintis jalan penyelesaian ke arah merapatkan jurang yang menghalang perpaduan;

- (ii) menjadikan kaedah mediasi komuniti sebagai usaha berterusan untuk menangani pertikaian, pertelingkahan dan persengketaan dalam komuniti setempat yang terdiri dari penghuni yang berbilang kaum dan agama dengan meningkatkan bilangan mediator komuniti dan melatih kembali (*retraining*) mereka dengan pendekatan-pendekatan dan kaedah-kaedah mediasi terbaru mengikut peredaran zaman;
- (iii) meremajakan agen-agen perpaduan di peringkat akar umbi agar mereka dapat berkhidmat kepada komuniti tanpa sebarang prejudis dan prasangka sesama mereka supaya selari dengan usaha kerajaan bagi melahirkan bangsa Malaysia yang berdikari, inovatif dan progresif;
- (iv) Jabatan Perpaduan Negara dan Integrasi Nasional juga komited dalam terus menerajui pendidikan perpaduan memandangkan inisiatif-inisiatif pemupukan perpaduan bermula di peringkat pra-sekolah lagi. Jabatan bercadang meningkatkan kualiti guru-guru di Tabika dan Taska Perpaduan melalui latihan yang lebih komprehensif agar mereka dapat mendidik anak-anak kecil sejak di bangku sekolah lagi untuk menghargai perpaduan yang merupakan hadiah yang tidak ternilai terutamanya di negara ini;
- (v) meneruskan pelaksanaan program-program sedia ada seperti Program Sayangi Komuniti (PSK) yang telah disasarkan untuk dilaksanakan di 456 lokasi miskin bandar dan pinggir bandar (B40) bagi meningkatkan keharmonian masyarakat setempat agar mereka hidup dengan selamat, aman dan sejahtera.
- (vi) pelaksanaan Program Latihan Industri Perpaduan (PLIP) turut diteruskan kerana ia merupakan salah satu platform untuk mengintegrasikan golongan mahasiswa melalui program *internship* di syarikat-syarikat swasta dan *Government Linked Companies* (GLCs) sebagai usaha untuk menggalakkan perkongsian silang kerjaya dan budaya antara golongan mahasiswa universiti yang terdiri dari pelbagai kaum dan latarbelakang keturunan. Bermula

dari 2015 hingga 2019, seramai 5,728 orang pelajar telah menyertai program ini.

Antara langkah taktikal lain yang dirancang oleh Kerajaan ke arah memelihara perpaduan negara dan kesejahteraan sosial adalah seperti berikut:

- (i) mewujudkan jaringan kerjasama strategik antara Rukun Tetangga (RT), Persatuan Penduduk (RA) dan Badan Bukan Kerajaan (NGO), sektor korporat, pihak swasta dan agensi-agensi kerajaan di seluruh negara bagi tujuan melaksanakan program-program menyantuni rakyat termasuk dalam memperkasa dan mensejahterakan golongan minoriti serta melaksanakan inisiatif-inisiatif mempromosikan perpaduan secara bersepadu bagi mendepani cabaran-cabaran perpaduan dengan baik dan secara berkesan;
- (ii) mengubah strategi dan pendekatan lama serta menggantikan aktiviti-aktiviti sedia ada bagi memberikan wajah dan imej baru kepada Kelab Rukun Negara (KRN) dan Sekretariat Rukun Negara (SRN) di semua sekolah dan universiti supaya para pelajar dari pelbagai kaum lebih tertarik dalam menyertai KRN dan SRN;
- (iii) meningkatkan pengetahuan dan menyebarkan maklumat-maklumat dan usaha-usaha kerajaan untuk membantu kaum Bumiputera di peringkat akar umbi bagi mencapai tahap ekonomi yang lebih tinggi melalui kerjasama dengan pelbagai kementerian dan agensi-agensi kerajaan lain;
- (iv) menyebarkan maklumat-maklumat yang boleh membantu kaum minoriti melibatkan diri dalam arus pembangunan perdana sebagaimana yang dihasratkan melalui Wawasan Kemakmuran Bersama 2030 yang diumumkan oleh YAB Perdana Menteri baru-baru ini .

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN AHMAD FADHLI BIN SHAARI
[PASIR MAS - PAS]**

TARIKH : 4 DISEMBER 2019 (RABU)

SOALAN

Minta **MENTERI BELIA DAN SUKAN** menyatakan apakah rasional di sebalik langkah Kementerian melarang penggunaan logo Kementerian Belia dan Sukan dan Logo Bulan Sukan Negara 2019 melainkan dimohon terlebih dahulu melalui Unit Komunikasi Korporat, Kementerian Belia dan Sukan seperti notis yang ditularkan pada 19 September 2019.

JAWAPAN

Yang di-Pertua,

1. Kementerian Belia dan Sukan (KBS) telah mendaftarkan logo rasminya dan logo Bulan Sukan Negara dengan Perbadanan Harta Intelekt Malaysia (MyIPO) dan dilindungi oleh Akta Cap Dagangan 1976 dan Peraturan Cap Dagangan 1997 daripada sebarang penyalahgunaan dan eksploitasi.
2. Notis makluman mengenai larangan penggunaan logo–logo tersebut adalah bertujuan untuk menjelaskan prosedur dan memastikan pengguna logo–logo tersebut mematuhi garis panduan penjenamaan serta bagi mengelakkan ia digunakan tanpa mengikut ketetapan yang ditetapkan oleh pihak Kementerian.

3. Tindakan ini juga dapat memastikan penggunaan logo KBS digunakan untuk penganjuran program serta perkara-perkara lain yang mendapat pengiktirafan, diyakini dan memberi impak positif kepada masyarakat. Selain, pemohon bertanggungjawab untuk memelihara nama baik, imej, kredibiliti dan reputasi KBS melalui penggunaan logo secara wajar dan bersesuaian.

4. Kementerian Belia dan Sukan telah mewujudkan mekanisme yang sistematik bagi memproses dan memberikan kelulusan kepada permohonan mengikut tempoh yang ditetapkan berdasarkan Garis Panduan Permohonan Penggunaan Logo KBS yang telah disediakan oleh Bahagian Dasar dan Perancangan Strategik dan Unit Komunikasi Korporat bertarikh 20 Ogos 2018. Jika penggunaan logo tersebut didapati melanggar syarat-syarat penggunaan logo KBS, tindakan undang-undang boleh diambil berdasarkan nasihat daripada PUU selaras dengan yang terkandung dalam Akta Perbadanan Harta Intelek Malaysia 2002. Jika UKK mendapati penggunaan logo tersebut akan memberikan kesan kepada KBS, UKK boleh menulis bagi mendapatkan pandangan dan ulasan PUU sebelum diangkat ke KSU bagi tindakan selanjutnya.

5. Bagi memastikan proses permohonan lancar pemohon boleh memuat naik borang permohonan di laman portal rasmi KBS atau menghubungi Unit Komunikasi Korporat KBS untuk bantuan proses permohonan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN JONATHAN YASIN [RANAU]

TARIKH : 4 DISEMBER 2019 (RABU)

SOALAN

Minta **MENTERI HAL EHWAL EKONOMI** menyatakan sejak bermula operasi Petronas di negeri Sabah pada 1976, berapakah jumlah pendapatan kasar keseluruhan yang telah diperolehi oleh Petronas dari sumber-sumber hasil minyak/petroleum dan gas serta hasil-hasil yang berkaitan dengannya tanpa mengambil kira sama ada sumber minyak/petroleum dan gas yang diperolehi tersebut adalah di dalam 3 batu nautika atau diluar 3 batu nautika dari persisiran pantai Sabah.

JAWAPAN

Tuan Yang di-Pertua,

1. Untuk makluman Ahli Yang Berhormat, untuk rekod PETRONAS, bayaran hasil tunai petroleum yang telah disalurkan kepada Kerajaan Negeri Sabah sehingga 31 Disember 2018 adalah berjumlah RM15.6 billion.
2. Jumlah ini adalah berdasarkan bayaran lima peratus daripada hasil pengeluaran kasar petroleum, dimana ia disalurkan terus oleh PETRONAS kepada Kerajaan Negeri Sabah pada bulan Februari dan Ogos setiap tahun. Maklumat terperinci tentang jumlah hasil pengeluaran kasar petroleum turut disertakan bersama laporan pembayaran tunai tersebut kepada Kementerian Kewangan Negeri Sabah.

NO. SOALAN : 9

3. Untuk makluman Ahli Yang Berhormat, semua pengeluaran petroleum di Malaysia dilakukan melalui "*Production Sharing Contracts (PSC)*" bersama pelabur-pelabur. Berdasarkan perjanjian PSC ini, pendapatan kasar keseluruhan untuk setiap PSC adalah tertakluk kepada klausa "*non-disclosure*", dengan izin, dan tidak harus didedahkan kepada umum.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN

**DARIPADA : YB DATO' HAJI JALALUDDIN BIN HAJI ALIAS
(JELEBU)**

TARIKH : 4 DISEMBER 2019 (RABU)

SOALAN

Minta **PERDANA MENTERI** menyatakan perancangan Kerajaan dalam mengawal selia produk-produk halal di pasaran sekaligus mengelakkan penyalahgunaan logo halal sehingga menimbulkan kekeliruan di kalangan rakyat.

**JAWAPAN : (YB TIMBALAN MENTERI DI JABATAN PERDANA
MENTERI)**

Tuan Yang di-Pertua,

1. Untuk makluman Ahli Yang Berhormat, JAKIM dan Majlis/Jabatan Agama Islam Negeri-negeri selaku Pihak Berkuasa Berwibawa dalam pensijilan halal sentiasa mengambil berat dalam mengawal selia produk-produk di pasaran dan di premis-premis. Pemantauan dilakukan secara berkala untuk memastikan tidak berlaku penyalahgunaan logo halal. Pengguna juga boleh memainkan peranan dalam memastikan penyalahgunaan logo halal tidak berlaku di pasaran dengan membuat aduan kepada pihak berkuasa di atas. Pengguna boleh memeriksa dengan pantas status halal sesuatu produk di pasaran sama ada melalui direktori halal di portal www.halal.gov.my, atau melalui aplikasi telefon pintar iaitu aplikasi “Smart Halal” dan “Verify Halal” yang boleh dimuat turun melalui sistem android mahupun iOS. Pengguna boleh membuat aduan melalui media sosial facebook Bahagian Hab Halal JAKIM atau

emel ke pr.halal@islam.gov.my atau melalui panggilan telefon sekiranya didapati terdapat keraguan pada sesuatu produk yang berada di pasaran.

2. Undang-Undang sedia ada juga telah memperuntukkan bahawa penggunaan logo halal tanpa Sijil Pengesahan Halal Malaysia (SPHM) yang sah adalah merupakan satu kesalahan di bawah Akta Perihal Dagangan 2011 (APD 2011) yang dikuatkuasakan oleh Kementerian Perdagangan dalam Negeri dan Hal Ehwal Pengguna (KPDNHEP).

3. Kesalahan di bawah Akta ini boleh didenda sehingga RM100,000.00 atau penjara maksimum tiga tahun atau kedua-duanya bagi individu, atau sehingga RM250,000.00 bagi pertubuhan perbadanan jika sabit kesalahan.

4. Manakala bagi pengusaha yang memperdayakan pengguna dengan penggunaan ayat al-Quran sebagai hiasan atau menggunakan jenama dan nama produk bercirikan keluaran Muslim serta membuat apa-apa representasi atau perbuatan yang boleh memperdaya dan mengelirukan pengguna juga merupakan suatu kesalahan.

5. Kesalahan di bawah Perintah ini:

a) Jika orang itu ialah suatu pertubuhan perbadanan, didenda tidak melebihi 5 juta ringgit, dan bagi kesalahan yang kedua atau yang berikutnya, didenda tidak melebihi 10 juta ringgit; atau;

b) Jika orang itu bukan suatu pertubuhan perbadanan, didenda tidak melebihi satu (1) juta atau dipenjarakan selama tempoh tidak melebihi tiga (3) tahun atau kedua-duanya, dan bagi kesalahan yang kedua atau seterusnya, didenda tidak melebihi lima (5) juta ringgit atau dipenjarakan selama tempoh tidak melebihi lima(5) tahun atau kedua-duanya.

6. Tindakan penguatkuasaan bersama-sama KPDNHEP sentiasa dilaksanakan bagi kes-kes yang berlaku di bawah Perintah Perihal Dagangan (Perakuan dan Penandaan Halal dan Perintah Perihal Dagangan (Takrif Halal), APD 2011. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN NOR AZRINA BINTI SURIP
[MERBOK – PH – PKR]**

TARIKH : 4 DISEMBER 2019

SOALAN

Minta **MENTERI BELIA DAN SUKAN** menyatakan apakah hala tuju yang dirancang oleh Kementerian dengan penubuhan *Youth Power Club* (YPC) kepada golongan belia dalam memupuk belia ke arah menjadi pelapis kepimpinan di masa akan datang.

JAWAPAN

Yang di-Pertua,

1. Hala tuju dan objektif yang dirancang oleh Kementerian dalam penubuhan *Youth Power Club* (YPC) adalah berdasarkan kepada pindaan kepada Akta Pertubuhan Belia dan Pembangunan Belia 2007 yang mana penumpuan diberikan kepada belia di peringkat akar umbi yang berumur di bawah umur 30 tahun berbanding kepimpinan pertubuhan belia yang lain rata-ratanya berumur lebih 30 tahun.

2. Pada masa yang sama terdapat 3 perkara yang akan diberikan penekanan:

(a) Untuk melahirkan pimpinan belia di bawah umur 30 tahun;

NO. SOALAN : 11

- (b) Menggalakkan pengkaderan golongan wanita muda khususnya yang berumur 25 tahun ke bawah dalam persatuan belia; dan
 - (c) Menjadikan aktiviti kesukarelawanan sebagai aktiviti yang tersemat dalam hati golongan muda.
3. Akhirnya, usaha ini diharapkan akan dapat melahirkan lebih banyak pimpinan muda di seluruh Malaysia.

Sekian, terima kasih.

**PEMBERITAHUAN PERTANYAAN LISAN DEWAN NEGARA
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' HAJI MOHD. SALIM SHARIF [JEMPOL]

TARIKH : 04 DISEMBER 2019 [RABU]

SOALAN

Minta **MENTERI HAL EHWAL EKONOMI** menyatakan status terkini berkenaan Dana Khas Pelajar Cemerlang ke Universiti Luar Negara FELDA (DKPCLNF).

JAWAPAN

Tuan Yang di-Pertua,

1. Untuk makluman ahli Yang Berhormat, pada bulan Oktober 2018, pengurusan FELDA telah membuat keputusan untuk tidak meneruskan program Dana Khas Pelajar Cemerlang ke Universiti Luar Negara-FELDA mulai tahun 2019 berikutan kekangan aliran kewangan yang dialami FELDA pada waktu itu.
2. Namun begitu, pembiayaan pengajian masih diteruskan bagi pelajar yang sedang mengikuti pengajian di peringkat Ijazah Sarjana Muda di universiti luar dan dalam negara sehingga mereka tamat pengajian.
3. Pada masa ini, terdapat seramai 17 orang pelajar tajaan FELDA yang masih mengikuti pengajian di peringkat Ijazah di universiti luar dan dalam negara.

4. Di samping itu, seramai 11 orang pelajar sedang mengikuti Program Persediaan (A-Level) di Kolej Yayasan UEM (KYUEM). FELDA sedang melihat kepada alternatif untuk bekerjasama dengan agensi Kerajaan dan syarikat swasta bagi menyediakan pembiayaan kepada mereka untuk pengajian di peringkat Ijazah Sarjana Muda. Namun begitu, ianya bergantung kepada keputusan yang diperolehi oleh pelajar tersebut.

Sekian, terima kasih.

PEMBERITAHUAN PERTANYAAN
MESYUARAT KETIGA, PENGGAL KEDUA
PARLIMEN KEEMPAT BELAS (2019)
DEWAN RAKYAT

PERTANYAAN : LISAN

TARIKH : 4 DISEMBER 2019 | RABU

**DARIPADA : DATO' HAJI MOHD FASIAH
BIN HAJI MOHD FAKEH [SABAK BERNAM]**

SOALAN

DATO' HAJI MOHD FASIAH BIN HAJI MOHD FAKEH [SABAK BERNAM] minta **PERDANA MENTERI** menyatakan setakat manakah prestasi pengurusan jemaah Haji Malaysia bagi tahun 2019/1440H baru-baru ini dan mengapa masih terdapat jemaah haji Malaysia yang terkandas dan tidak dapat menunaikan fardhu haji.

JAWAPAN : (MENTERI DI JABATAN PERDANA MENTERI)

Tuan Yang Di-Pertua,

Untuk makluman Ahli Yang Berhormat, operasi haji yang dilaksanakan oleh Lembaga Tabung Haji (**TH**) pada tahun ini secara keseluruhannya berjalan dengan lancar tanpa sebarang insiden besar yang tidak diingini. Jemaah haji Malaysia dapat menyelesaikan ibadat haji mereka dengan selamat dan sempurna. Operasi haji bagi musim 1440H/2019M telah berakhir pada 13 September 2019 dengan ketibaan kumpulan terakhir jemaah haji Malaysia seramai 475 orang di KLIA, Sepang pada tarikh tersebut.

Pada kesempatan dalam dewan yang mulia ini, pihak **TH** ingin mengucapkan terima kasih kepada semua pihak yang terlibat terutama Tuanku Raja Salman bin Abdul Aziz Al Saud, Kedutaan Besar Diraja Arab Saudi di Malaysia dan Kementerian Haji dan Umrah Arab Saudi. Ucapan

NO. SOALAN : 13

terima kasih juga kepada agensi-agensi yang terlibat antaranya Kementerian Kesihatan, Jabatan Kastam, Kementerian Dalam Negeri, Jabatan Imigresen, Polis DiRaja Malaysia, Jabatan Pendaftaran Negara, Jabatan Kebajikan Masyarakat, Pejabat Setiausaha Kerajaan Negeri, Majlis Agama Islam Negeri-negeri, syarikat penerbangan Malaysia Airlines dan Flynas serta Malaysia Airports yang telah banyak membantu dalam memastikan kelancaran operasi haji di Tanah Air dan Tanah Suci pada musim haji kali ini. Semoga kerjasama erat dan hubungan baik di antara Kerajaan Malaysia dan Kerajaan Arab Saudi akan berkekalan dan sokongan semua pihak ini berterusan pada musim-musim haji akan datang.

Tuan Yang Di-Pertua,

Mengenai berita rakyat Malaysia yang terkandas pula, untuk makluman Ahli Yang Berhormat, kesemua individu yang terlibat berangkat ke Tanah Suci dengan beranggapan menggunakan visa haji Furada yang dikeluarkan oleh pihak Kedutaan Arab Saudi di Malaysia. Pemberian visa haji Furada ini tidak menggunakan kuota rasmi jemaah haji Malaysia yang berjumlah 30,200 orang pada musim haji 1440H/2019M.

Pemergian kumpulan tersebut ke Tanah Suci diuruskan oleh syarikat persendirian dan tidak dilesenkan oleh **TH**. Sehubungan itu, mereka ini adalah tidak tertakluk langsung mahupun berada di bawah bidang kuasa **TH**. Namun, **TH** prihatin dengan keadaan kumpulan tersebut dan memastikan kebajikan mereka adalah terjaga daripada aspek makan minum dan penjagaan kesihatan.

Sekian. Terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS
MAJLIS MESYUARAT DEWAN RAKYAT

PERTANYAAN : PERTANYAAN-PERTANYAAN JAWAB LISAN

DARIPADA : DATUK ZAHIDI BIN ZAINUL ABIDIN
[PADANG BESAR]

TARIKH : 4 DISEMBER 2019 [RABU]

SOALAN

DATUK ZAHIDI BIN ZAINUL ABIDIN [PADANG BESAR] minta **MENTERI INDUSTRI UTAMA** menyatakan apakah kaedah dan mekanisme yang telah dilakukan Kementerian bagi mengawal harga getah yang sangat tidak menentu dan usaha Kementerian bagi membantu penoreh getah dalam menambah pendapatan harian mereka.

JAWAPAN

Tuan Yang Di-Pertua,

Kerajaan amat prihatin dan mengambil maklum berkaitan isu ketidakstabilan harga pasaran komoditi getah. Sehubungan itu, Kerajaan telah melaksanakan langkah-langkah untuk meningkatkan pendapatan pekebun kecil getah seperti berikut:

Langkah jangka masa pendek

- (a) memberi pulangan harga yang lebih baik (harga di peringkat ladang) kepada pekebun kecil dengan mengurangkan rantaian jualan (peraih) menggunakan kaedah peningkatan penjualan terus kepada koperasi melalui Mekanisma Penetapan Harga Di Ladang. Pihak koperasi boleh

memberi harga yang lebih tinggi kepada pekebun kecil kerana pihak koperasi berurusan secara terus dengan kilang pemproses secara pukal. Sehingga kini, sebanyak 19 koperasi terlibat dalam urusan niaga getah dan menawarkan harga pada puratanya RM0.10 sehingga RM0.20 sekilogram *cuplump* lebih tinggi berbanding pembeli getah.

- (b) Kerajaan melalui LGM telah memperkenalkan sistem belian secara atas talian MyROL dan telah digunakan oleh lima pusat pembelian getah secara berkelompok. Harga yang ditawarkan oleh pusat pembelian ini melalui sistem ini adalah lebih kompetitif dan memberi pulangan yang lebih tinggi kepada pekebun kecil kerana capaian kepada pembeli lebih meluas.
- (c) melaksanakan Insentif Pengeluaran Getah (IPG) pada tahun 2015 sebagai satu mekanisma sokongan harga ladang getah dengan tujuan untuk mengurangkan beban ekonomi pekebun kecil getah di samping menggalakkan mereka untuk terus menoreh sewaktu harga rendah di pasaran. Berdasarkan harga getah yang terlalu rendah pada penghujung tahun 2018, Kerajaan telah menambahbaik pelaksanaan Insentif Pengeluaran Getah (IPG) dengan menaikkan Paras Harga Pengaktifan (PHP) IPG daripada RM2.20 kepada RM2.50 sekilogram getah sekerap bermula 1 Januari 2019. Sehingga 31 Ogos 2019, Kerajaan telah membelanjakan sebanyak RM 185 juta untuk IPG

Langkah jangka masa panjang

- (a) meningkatkan penggunaan getah dalam negara melalui penggunaan getah dalam pembinaan jalan raya dan penghasilan produk-produk baru dan bernilai tambah berasaskan getah seperti *Seismic Bearing*, sarung tangan getah dan lain-lain.
- (b) memperuntukkan RM100 juta pada tahun ini bagi pembinaan dan penyelenggaraan jalan raya berasaskan getah daripada *cuplump modified bitumen* (CMB). Projek ini sedang dilaksanakan oleh pihak JKR dan dipantau oleh pihak LGM. Projek ini dapat meningkatkan

SOALAN NO : 14

penggunaan getah domestik dan memberi impak kepada harga getah dengan mengurangkan stok antarabangsa dalam jangka masa panjang.

- (c) Selain itu, di peringkat antarabangsa, Malaysia komited dan terus bekerjasama dengan negara pengeluar utama getah seperti Thailand dan Indonesia di bawah kerangka *International Tripartite Rubber Council (ITRC)* bagi memperkukuhkan harga getah. Di bawah kerjasama ini, syer pengeluaran ketiga-tiga negara ini adalah 67% daripada pengeluaran getah asli dunia pada tahun 2018. Skim Kuota Pengeksportan yang Dipersetujui (*Agreed Export Tonnage Scheme - AETS*) merupakan mekanisme jangka pendek untuk mengurangkan bekalan getah antarabangsa.
- (d) menggalakkan amalan integrasi kepada pekebun kecil untuk mendapatkan pendapatan sampingan. Tanaman getah boleh diintegrasikan dengan pelbagai jenis tanaman sama ada jangka pendek, sederhana dan panjang. Antara tanaman yang sesuai termasuk pisang, betik, nenas, durian dan buah salak. Selain itu, integrasi ternakan seperti lebah dan kelulut juga berpotensi untuk diusahakan. Pengintegrasian yang sistematik dan mengamalkan Amalan Pertanian Baik (*Good Agriculture Practices, GAP*) membolehkan pekebun kecil mendapat pendapatan selain daripada tanaman getah sehingga pokok getah mencapai usia 30 tahun.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN P. PRABAKARAN
[BATU – PH – PKR]**

TARIKH : 4 DISEMBER 2019

SOALAN

Minta **MENTERI BELIA DAN SUKAN** menyatakan apakah tindakan Kementerian terhadap insiden bola sepak yang berlaku di Indonesia baru-baru ini. Apakah tindakan Kementerian dalam menjaga kedaulatan negara dan demi penyokong-penyokong negara yang dikasari oleh penyokong Indonesia.

JAWAPAN

Yang di-Pertua,

1. Untuk makluman Ahli Yang Berhormat, Kementerian Belia dan Sukan (KBS) dengan kerjasama Persatuan Bolasepak Malaysia (FAM) amat prihatin terhadap keselamatan pasukan kebangsaan dan pasukan penyokongnya terutamanya ketika beraksi di Indonesia. Insiden yang berlaku ketika perlawanan pusingan ke-2 Kelayakan Piala Dunia 2022/ Piala Asia 2023 di mana pasukan kebangsaan bertemu dengan pasukan Indonesia di Stadium Bung Karno, Jakarta pada 5 September yang lalu sudah dijangkakan dan tindakan awal telahpun diambil oleh pihak FAM.
2. FAM telah mengambil tindakan sewajarnya dengan mengadakan dua (2) sesi mesyuarat bersama Pihak Berkuasa Tempatan Indonesia pada 20 Ogos dan 27 Ogos 2019 lalu. Mesyuarat yang turut dihadiri oleh Timbalan Komander Pasukan Simpanan Persekutuan (FRU) telah membincangkan aspek keselamatan pemain dan juga penyokong yang perlu diberi perhatian oleh Persatuan Sepak Bola Seluruh Indonesia (PSSI).
3. PSSI dengan kerjasama Pihak Berkuasa Tempatan Indonesia telah mengambil tindakan dengan menyediakan polis pengiring dari lapangan terbang ke stadium khususnya untuk pasukan Harimau Malaysia dan lebih 300 penyokong negara pada hari perlawanan berlangsung. Namun begitu, insiden rusuhan masih berlaku akibat tindakan agresif penyokong tuan rumah Indonesia.
4. Kementerian telahpun mengeluarkan kenyataan keras supaya Konfederasi Bola Sepak Asia (AFC) dan Persatuan Bola Sepak Antarabangsa (FIFA) memberikan perhatian serius bagi menangani isu tersebut dan berharap tindakan sewajarnya diambil. Persatuan Bola Sepak Malaysia (FAM) juga telah membuat keputusan untuk mengambil tindakan terhadap insiden yang berulang ini dengan menghantar laporan kejadian kepada Persekutuan (FIFA) melalui AFC. Tindakan atau hukuman yang

sewajarnya adalah perlu dilakukan oleh AFC mahupun FIFA kepada PSSI supaya insiden seumpama ini tidak berlaku lagi.

5. Pihak FIFA telah menerima laporan Komisar Pertandingan FIFA yang termasuk juga laporan FAM dan laporan Pengawas Keselamatan FIFA. Dimaklumkan bahawa FIFA telah menghantar "*Charge Notice*" kepada pihak PSSI yang memerlukan mereka memberi maklum balas dalam tempoh 7 hari dan boleh dilanjutkan untuk selama 7 hari lagi. FIFA seterusnya akan membawa kes tersebut kepada Jawatankuasa Disiplin FIFA yang akan membuat keputusan tindakan atau hukuman yang akan dikenakan kepada PSSI. Proses Jawatankuasa Disiplin FIFA biasanya berlaku dalam tempoh 14 hingga 45 hari. PSSI boleh merayu untuk mengenyepikan hukuman atau tindakan yang akan dimaklumkan terus kepada PSSI. Namun begitu, tertakluk kepada keputusan rayuan, hukuman yang dikenakan oleh FIFA akan terus dilaksanakan. Sepanjang proses ini berlaku, FAM tidak akan terlibat sebaliknya hanya akan dimaklumkan keputusan FIFA terhadap PSSI sahaja. Laporan FAM juga telah dikemukakan kepada AFC sebagai penganjur pertandingan tersebut dan kebiasaannya pihak AFC akan menunggu keputusan siasatan yang dikendalikan oleh FIFA yang merupakan badan tertinggi bola sepak antarabangsa.

6. Kementerian juga telah menghubungi pihak Kedutaan Malaysia di Indonesia dan dimaklumkan bahawa tiadanya tindakan susulan dari pihak PSSI mahupun pihak berkuasa Indonesia menangani isu tersebut selain dari permohonan maaf Menteri Pemuda Olahraga Indonesia.

7. Pada masa yang sama juga, FAM telah memohon khidmat nasihat daripada AFC untuk membantu menyediakan pelan komprehensif menjelang pertemuan perlawanan kedua dan seterusnya untuk perlawanan-perlawanan lain di masa akan datang supaya peristiwa ini tidak berulang.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : YB DATO' SRI DR. HAJI ISMAIL BIN HAJI
ABD. MUTTALIB [MARAN]**

TARIKH : 04 DISEMBER 2019

SOALAN

Minta **MENTERI SUMBER MANUSIA** menyatakan berapa ramai rakyat Malaysia yang berkhidmat di luar negara dan di negara mana. Apakah usaha Kerajaan untuk membawa mereka pulang bekerja di negara sendiri (Malaysia).

JAWAPAN

Tuan Yang di-Pertua,

1. Menerusi Laporan *Malaysia Economic Monitor: Brain Drain* yang diterbitkan oleh Bank Dunia dengan kerjasama Kerajaan Malaysia pada April tahun 2011, kira-kira satu juta rakyat Malaysia menetap di luar negara, di mana satu-pertiga daripada jumlah tersebut merupakan tenaga berkepakaran tinggi. Namun begitu, laporan tersebut turut mengakui bahawa penghijrahan sedemikian bukan terhad hanya kepada Malaysia, malah fenomena penghijrahan ini turut berlaku kepada negara-negara lain memandangkan terdapat *global war for talent*.

Tuan Yang di-Pertua,

2. Kementerian Sumber Manusia melalui Talent Corporation Malaysia Berhad (TalentCorp) telah membuat beberapa perancangan jangka-pendek dan jangka panjang untuk menarik profesional Malaysia

yang bermastautin di luar negara pulang berkhidmat di tanah air. Antaranya adalah:

- Mengadakan sesi temu seru (*outreach*) dengan para profesional Malaysia terutamanya di negara-negara yang dikenal pasti mempunyai populasi rakyat Malaysia yang tinggi. Sesi temu seru ini diadakan dengan keterlibatan syarikat Malaysia dengan matlamat untuk mengetengahkan peluang-peluang pekerjaan profesional yang terbuka luas di Malaysia.
- Seterusnya, memudahcara kepulangan profesional Malaysia melalui *Returning Expert Programme (REP)*.

3. Program REP memberi suatu bentuk pemudahan (*facilitation*) untuk pulang kepada pakar-pakar warga negara Malaysia yang berada di luar negara dan mempunyai kemahiran tinggi dalam bidang-bidang yang amat diperlukan negara. Antara insentif yang diberikan kepada individu-individu yang mendapat kelulusan di bawah Program REP adalah seperti berikut:

- Pertama, kadar cukai 15 peratus atas pendapatan pekerjaan yang dikenakan cukai bagi tempoh lima tahun berturut-turut apabila kembali ke Malaysia;
- Kedua, pengecualian duti / cukai ke atas pembelian sebuah kereta buatan tempatan (CKD) atau membawa balik kereta import sepenuhnya yang telah siap dipasang di negara pengeluar (CBU) bagi setiap pemohon REP yang diluluskan, tertakluk kepada nilai pengecualian cukai sebanyak RM150,000;
- Ketiga, kelayakan taraf Pemastautin Tetap (*Permanent Resident*) kepada pasangan dan anak yang memegang kewarganegaraan asing secara *fast track* dalam tempoh enam (6) bulan selepas permohonan lengkap diterima oleh Jabatan Imigresen Malaysia (JIM); dan

- Keempat, pengecualian cukai bagi semua barangan milik peribadi yang di bawa ke Malaysia.

4. Pelaksanaan REP juga telah melalui beberapa fasa penambahbaikan bagi memastikan kualiti modal insan berkemahiran tinggi yang diluluskan adalah selaras dengan keperluan semasa industri dan ekonomi negara. Melalui penambahbaikan pelaksanaan REP juga, 5,137 modal insan berkemahiran tinggi telah diluluskan di bawah program ini sehingga bulan April 2019.

5. Antara Sektor Industri Teratas bagi kelulusan REP ialah:

- Minyak, Gas dan Tenaga;
- Perkhidmatan Kewangan;
- Perkhidmatan Perniagaan;
- Kandungan Komunikasi dan Infrastruktur;
- Perubatan.

Manakala Negara Teratas bagi kelulusan REP seperti berikut:

- Singapura;
- China;
- Arab Saudi;
- United Arab Emirates (UAE);
- England.

6. Sebagai perancangan jangka panjang, Kementerian juga telah mengambil pendekatan strategik untuk memudahcara bakat Malaysia di luar negara memberikan sumbangan mereka untuk pembangunan negara. Pendekatan-pendekatan yang telah dikenal pasti adalah seperti berikut:

- Pertama, perkongsian, pertukaran dan pemindahan ilmu pengetahuan, kemahiran, teknologi dan kajian dalam bidang pembelajaran dan pertumbuhan utama negara;

SOALAN NO : 16

- Kedua, memudahkan jaringan perhubungan untuk memacu lebih banyak sumbangan dari bakat-bakat Malaysia di luar negara;
- Ketiga, mewujudkan ruang perniagaan melalui perkongsian, usaha sama dan peluang pelaburan;
- Keempat, platform perkongsian hasil kajian dan syor-syor penambahbaikan berkaitan dengan sektor utama ekonomi; dan
- Kelima, khidmat rundingan profesional dan maklumat dalam bidang kepakaran masing-masing.

7. Melalui inisiatif-inisiatif sebagaimana yang telah dinyatakan ini, Kerajaan komited untuk menarik, memupuk dan mengekalkan bakat-bakat berkemahiran tinggi warga Malaysia untuk memberi sumbangan pengetahuan, pengalaman dan kemahiran yang diperlukan bagi pembangunan negara.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN SIVAKUMAR VARATHARAJU
NAIDU [BATU GAJAH]**

TARIKH JAWAPAN : 4 DISEMBER 2019 [RABU]

SOALAN NO.17

Minta **MENTERI AIR, TANAH DAN SUMBER ASLI** menyatakan keadaan paras air di semua empangan-empangan seluruh negara. Nyatakan juga tindakan-tindakan yang telah diambil untuk menangani atau menghadapi penyusutan paras air apabila berlaku keadaan kritikal.

JAWAPAN

Tuan Yang di-Pertua,

Untuk makluman Yang Berhormat, secara keseluruhannya bagi tahun 2019, kebanyakan empangan utama di Semenanjung Malaysia dan Wilayah Persekutuan Labuan berada pada paras yang terkawal. Walau bagaimanapun, terdapat dua negeri yang mempunyai empangan yang berada di paras kritikal iaitu Melaka dan Johor. Empangan yang mencatat bacaan di bawah paras kritikal adalah Empangan Durian Tunggal, Melaka dan Empangan Lebam, Empangan Upper Layang, Empangan Pulau 2, Empangan Labong dan Empangan Machap bagi Negeri Johor.

Penyusutan air di empangan-empangan ini adalah disebabkan fenomena cuaca panas yang panjang serta kekurangan taburan hujan. Ia memberi kesan kepada kecukupan air mentah bagi disalurkan kepada kepada loji rawatan air.

Antara tindakan segera yang telah dilaksanakan oleh kedua-dua negeri ini bagi menangani masalah penyusutan air empangan termasuk pengepaman air mentah daripada sumber lain, pencarian sumber air alternatif seperti air bawah tanah dan sebagainya. Di samping itu, Bekalan Air Berjadual turut dilaksanakan bagi mengurangkan gangguan bekalan air bersih kepada penduduk akibat kemerosotan sumber air mentah.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS
MAJLIS MESYUARAT DEWAN RAKYAT

PERTANYAAN : LISAN

DARIPADA : TUAN CHE ALIAS BIN HAMID [KEMAMAN]

TARIKH : 4 DISEMBER 2019

SOALAN

TUAN CHE ALIAS BIN HAMID [KEMAMAN] minta **MENTERI INDUSTRI UTAMA** menyatakan punca utama pihak Lembaga Lada Malaysia (LLM) menghentikan sementara pembelian lada hitam sehingga menjejaskan pendapatan pengusaha dan penanam lada hitam.

JAWAPAN

Tuan Yang Di-Pertua,

Untuk makluman Ahli Yang Berhormat, punca utama pihak Lembaga Lada Malaysia (MPB) menghentikan sementara pembelian lada khususnya pada masa kemuncak iaitu musim penuaian lada adalah kerana kapasiti stor di seluruh pejabat cawangan MPB tidak mampu menampung penyimpanan stok sekiranya aktiviti pembelian masih diteruskan. Dalam hal ini, aktiviti pembelian lada akan diberhentikan untuk tempoh 2 minggu bagi menyelaraskan semula ruang stor simpanan dan aktiviti pembelian lada akan disambung semula dengan pembelian harga yang sama.

Sehubungan itu, pelbagai langkah telah diambil oleh MPB untuk mengurangkan kepadatan semasa musim penuaian lada dan telah melakukan yang terbaik untuk menampung dan membeli lada daripada pekebun lada setiap hari. Pihak MPB juga telah membeli lada pada harga di antara RM0.80 hingga RM2.00 sekilogram lebih tinggi daripada harga semasa yang ditawarkan oleh peniaga lada (*traders*) di Malaysia bergantung kepada lokasi. Hal ini dilakukan supaya dapat membantu para pekebun lada mendapatkan nilai yang lebih tinggi untuk komoditi lada seterusnya dapat meningkatkan pendapatan mereka.

Sekian, terima kasih

**PEMBERITAHUAN PERTANYAAN
MESYUARAT KETIGA, PENGKAL KEDUA
PARLIMEN KEEMPAT BELAS (2019)
DEWAN RAKYAT**

PERTANYAAN : LISAN

TARIKH : 4 DISEMBER 2019 | RABU

**DARIPADA : TUAN YUSUF BIN ABD. WAHAB
[TANJONG MANIS]**

SOALAN

TUAN YUSUF BIN ABD. WAHAB [TANJONG MANIS] minta **PERDANA MENTERI** menyatakan adakah skim bantuan khas untuk bakal haji yang miskin di kawasan luar bandar untuk membolehkan mereka menunaikan haji.

**JAWAPAN : (TIMBALAN MENTERI DI JABATAN PERDANA
MENTERI)**

Tuan Yang Di-Pertua,

Pada kesempatan ini, ingin saya menyeru supaya umat Islam di negara ini mempunyai kefahaman bahawa memperolehi kuota haji dan terpilih untuk menunaikan ibadat haji termasuk dalam maksud kemampuan (*istito'ah*) yang merupakan salah satu syarat wajib haji. Kemampuan bukan sekadar dari segi kewangan sahaja, tetapi kemampuan adalah sesuatu yang dinamik dan merangkumi persediaan dalam pelbagai aspek bagi tujuan menunaikan haji.

Untuk makluman Ahli Yang Berhormat, Lembaga Tabung Haji (**TH**) tidak mewujudkan skim bantuan khas untuk golongan miskin atau yang kurang berkemampuan untuk menunaikan haji. Penubuhan **TH** itu sendiri merupakan satu usaha untuk membantu mereka yang tidak

berkemampuan untuk simpan sedikit demi sedikit bagi tujuan untuk menunaikan fardhu haji.

Namun begitu, **TH** sentiasa prihatin dengan individu yang telah terpilih mengikut giliran menunaikan haji tetapi terpaksa menolak tawaran kerana kesulitan kewangan dan mereka ini secara konsisten menyimpan secara sedikit demi sedikit untuk tempoh yang panjang bagi menyempurnakan hajat untuk menunaikan haji.

Tertakluk kepada syarat-syarat tertentu, **TH** mengambil inisiatif dengan membantu sebahagian individu lanjut usia yang terpilih mengikut giliran daripada golongan yang disahkan kurang kemampuan kewangan ini dengan mencukupkan wang bayaran haji mereka. Dana tersebut diperoleh daripada sumbangan para jemaah haji, pendeposit atau individu dermawan yang menginfakkan kewangan mereka.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 4 DISEMBER 2019 (RABU)

SOALAN NO. 21

minta **PERDANA MENTERI** menyatakan adakah Kerajaan bersedia untuk menggubal suatu akta khusus untuk membendung ekstremisme dan fahaman perkauman sempit, di samping membina masyarakat yang bersatu padu dan hidup berharmoni.

**JAWAPAN : YB SENATOR TUAN WAYTHA MOORTHY A/L
PONNUSAMY, MENTERI DI JABATAN PERDANA MENTERI
(PERPADUAN NEGARA DAN KESEJAHTERAAN SOSIAL)**

Yang di-Pertua,

Adalah menjadi tanggungjawab dan kewajipan sesebuah Kerajaan yang berdaulat untuk menjamin keharmonian rakyatnya. Malaysia sebagai sebuah negara dengan masyarakatnya yang terdiri daripada kepelbagaian kaum, agama, budaya dan bahasa tidak terlepas berhadapan dengan insiden-insiden yang boleh menggugat perpaduan dan keharmonian negara.

Kerajaan tidak berhasrat untuk menggubal suatu undang-undang baharu sebagaimana yang dicadangkan oleh YB Lembah Pantai. Kerajaan hari ini telah mempunyai undang-undang yang mencukupi untuk menjaga keharmonian antara kaum dan agama dan mereka yang

sengaja memecahbelahkan perpaduan dan keharmonian negara akan didakwa di bawah undang-undang yang sedang berkuatkuasa.

Di bawah undang-undang sedia ada, mana-mana pihak dengan sengaja mencetuskan atau mengeluarkan sebarang kenyataan menggugat perpaduan dan keharmonian rakyat boleh disiasat dan didakwa di bawah akta-akta berikut:

- (i) Seksyen 298A - Kanun Keseksaan (Akta 574)
- (ii) Seksyen 233 - Akta Komunikasi dan Multimedia (AKMM) 1998

Sebenarnya apa yang diperlukan ialah tindakan tegas dan pantas oleh pihak penguatkuasa undang-undang ke atas kesalahan pelaku di bawah undang-undang yang sedang berkuat kuasa. Selain itu, masyarakat juga perlu dididik untuk memahami dan menghormati undang-undang. Kegagalan rakyat untuk menghormati undang-undang akan menggugat keharmonian negara dan mencetuskan suasana tidak aman.

Ketiadaan undang-undang spesifik berhubung dengan keharmonian antara kaum dan agama ketika ini tidaklah bermakna bahawa usaha-usaha memupuk perpaduan dan keharmonian masyarakat terus diabaikan, sebaliknya usaha menyatupadukan kaum di negara ini akan terus dipergiatkan lagi.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB PUAN NOORITA BINTI SUAL [TENOM]

TARIKH : 04 DISEMBER 2019

SOALAN

Minta **MENTERI SUMBER MANUSIA** menyatakan sama ada cuti paterniti yang bakal diwujudkan untuk pekerja swasta dalam pindaan Akta Kerja 1955 boleh dipanjangkan daripada tiga hari kepada tujuh hari.

JAWAPAN

Tuan Yang di-Pertua,

1. Cadangan untuk memperkenalkan cuti paterniti sebanyak 3 hari kepada suami yang isterinya bersalin merupakan antara peruntukan baharu yang diperuntukkan dalam pindaan Akta Kerja 1955. Jumlah cuti sebanyak 3 hari ini telah pun dipersetujui secara kolektif antara pihak majikan dan kesatuan pekerja melalui Mesyuarat Jawatankuasa Teknikal Pindaan Akta Kerja 1955 yang telah ditubuhkan.
2. Cadangan ini telah dipersetujui dan diluluskan oleh Mesyuarat Jemaah Menteri pada 12 Jun 2019. Justeru, cadangan cuti paterniti 3 hari akan dilaksanakan terlebih dahulu sebelum apa-apa pertimbangan meningkatkan kepada 7 hari.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN LUKANISMAN BIN AWANG SAUNI

[SIBUTI]

TARIKH : 4 DISEMBER 2019 (RABU)

SOALAN NO. 24

Minta **MENTERI AIR, TANAH DAN SUMBER ASLI** menyatakan apakah perancangan pihak Kementerian mengenai masalah hakisan pantai di kawasan Parlimen Sibuti seperti hakisan pantai Kuala Bakam, hakisan pantai Tusan, hakisan pantai Bungai dan hakisan Kuala Sibuti, adakah Kementerian masih mempunyai perancangan untuk menyiapkan benteng pemecah ombak bagi pantai Bungai.

JAWAPAN

Tuan Yang di-Pertua,

Kerajaan sememangnya memandang serius masalah hakisan pantai yang berlaku di seluruh Malaysia. Oleh yang demikian, masalah ini perlu ditangani secara berperingkat memandangkan kos bagi melaksanakan kaedah mengawal hakisan pantai seperti pembinaan *groyne*, penambakan pasir, pembinaan benteng batu mahupun membina pemecah ombak bagi mencegah hakisan pantai adalah sangat tinggi.

Dalam hal ini, Kerajaan terpaksa menumpukan kerja-kerja membina benteng baharu berbanding memperbaiki benteng yang telah rosak atau lain-lain kaedah bagi mencegah hakisan pantai **mengikut tahap kritikal hakisan pantai tersebut** dan mengikut tahap kesediaan peruntukan yang telah diluluskan.

Peruntukan baharu bagi program **mengatasi fenomena air pasang besar dan hakisan pantai di Negeri Sarawak** telah dipohon sebanyak RM 350 juta dalam RP4 2019 RMKe-11, yang merangkumi hakisan pantai di kawasan yang dilaporkan, namun tidak diluluskan. Walaubagaimanapun, peruntukan ini akan dipohon semula dalam RMK-12 akan datang.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN MOHD SHAHAR BIN ABDULLAH
[PAYA BESAR]**

TARIKH : 4 DISEMBER 2019 (RABU)

SOALAN NO.26

Minta MENTERI AIR, TANAH DAN SUMBER ASLI menyatakan :-

- (a) usaha Jabatan Perhutanan dalam mengenal pasti lokasi berisiko tinggi berlakunya kemalangan terhadap pengunjung di Taman Eko Rimba; dan
- (b) pindaan Akta Perhutanan dan Rang Undang-Undang Profesion Rimbawan dapat mengembalikan keyakinan bahawa pengurusan hutan di Malaysia diuruskan dengan berintegriti.

JAWAPAN:

(a)

Tuan Yang Dipertua,

Untuk makluman Ahli Yang Berhormat, Jabatan Perhutanan Semenanjung Malaysia (JPMS) melalui Jabatan Perhutanan Negeri sentiasa menjalankan pemeriksaan dan pemantauan secara berkala di kawasan Taman Eko-Rimba bagi mengenalpasti lokasi berisiko tinggi berlakunya kemalangan terhadap pengunjung dan seterusnya mengambil langkah-langkah yang sewajarnya bagi mengatasi atau mengurangkan risiko tersebut. Pemeriksaan dan pemantauan dibuat berdasarkan Panduan Pengenalpastian *Hazard*, Penaksiran Risiko dan Kawalan Risiko di Taman Eko-Rimba dan Hutan Taman Negeri yang dikeluarkan oleh JPMS.

Penyelenggaraan yang dijalankan di Taman Eko-Rimba adalah secara penyelenggaraan harian iaitu pungutan sampah, pembersihan tandas dan penjagaan kebersihan am, manakala penyelenggaraan landskap, pelupusan sampah sarap serta pemeriksaan bagi mengesan pokok-pokok dan kemudahan-kemudahan rekreasi yang boleh membahayakan pengguna di Taman Eko-Rimba dijalankan secara mingguan. Jabatan Perhutanan Negeri juga mengadakan pemantauan dan pembaikan ke atas infrastruktur di Taman Eko-Rimba yang melibatkan kerosakan *wear and tear* secara suku tahun. Selain daripada itu, pihak Jabatan Perhutanan Negeri juga membuat papan tanda amaran seperti di kawasan yang mempunyai risiko berlakunya kepala air dan sebagainya.

SOALAN NO. : 26

Rekod terkini kemalangan di Taman Eko-Rimba sehingga September 2019 adalah tujuh (7) kes lemas (Pahang=6, Terengganu=1), satu (1) kes sesat (Selangor) dan satu (1) kes tergelincir (Selangor).

(b)

Tuan Yang Dipertua,

Kementerian Air, Tanah dan Sumber Asli melalui Jabatan Perhutanan Semenanjung Malaysia (JPSM) sedang melaksanakan pindaan ke atas Akta Perhutanan Negara 1984 (Pindaan 1993) [*Akta 313*] sedia ada, yang meliputi keperluan untuk menambahbaik pentadbiran, pengurusan, pemeliharaan dan penguatkuasaan hutan di Semenanjung Malaysia.

Skop utama pindaan Akta 313 adalah :-

- (i) untuk memperketatkan proses pewartaan keluar Hutan Simpanan Kekal (HSK);
- (ii) untuk memantapkan penguatkuasaan hutan bagi membanteras kegiatan pengambilan hasil hutan secara haram;
- (iii) untuk meningkatkan kadar denda dan hukuman serta penalti tambahan bagi membendung kesalahan hutan yang merosakkan alam sekitar; dan
- (iv) untuk mengatasi isu kekaburan dan kuasa yang tidak jelas dalam pelaksanaan Akta 313.

Pada masa ini, profesion Rimbawan dikenali sebagai Pemelihara Hutan atau *Conservator of Forest* yang bertanggungjawab mengurus khazanah hutan negara. Objektif utama penggubalan RUU Rimbawan Malaysia adalah bagi mengiktiraf profesion Rimbawan melalui pendaftaran ahli-ahli

SOALAN NO. : 26

Rimbawan serta mewujudkan kerangka perundangan yang bertujuan untuk mengawalselia etika dan amalan perhutanan profesion Rimbawan dalam melaksanakan tanggungjawabnya. Di bawah Akta ini sebuah Lembaga iaitu Lembaga Rimbawan akan ditubuhkan bagi memberikan khidmat nasihat dan perkhidmatan teknikal professional berkaitan dengan Pengurusan Hutan Secara Berkekalan.

Salah satu peranan Lembaga Rimbawan adalah sebagai badan penilaian bebas yang akan menentusahkan Rancangan Pengurusan Hutan yang dihasilkan berdasarkan kepada piawaian yang digariskan di dalam dokumen Panduan Penyediaan Rancangan Pengurusan Hutan Bagi Negeri-negeri di Semenanjung Malaysia, Jabatan Perhutanan Semenanjung Malaysia (JPSM). Ia adalah selaras dengan keperluan untuk memelihara, memulihara dan mengurus sumber hutan secara berkekalan seperti dinyatakan di dalam Akta 313.

Selain itu, Lembaga Rimbawan juga akan berperanan untuk memaklumkan kepada rakyat Malaysia mengenai tindakan-tindakan yang dilaksanakan oleh Kerajaan melalui Jabatan Perhutanan bagi mencapai matlamat Pengurusan Hutan Secara Berkekalan (PHSB) dalam konteks *transparency* dan akauntabiliti.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : PUAN ALICE LAU KIONG YIENG
[LANANG]**

TARIKH : 4 DISEMBER 2019 (RABU)

SOALAN NO. 27

Minta **PERDANA MENTERI** menyatakan status perkembangan terkini bagi penubuhan Suruhanjaya Bebas Aduan Salah Laku Polis (IPCMC).

**JAWAPAN: YB DATUK LIEW VUI KEONG,
MENTERI DI JABATAN MENTERI**

Tuan Yang di-Pertua,

1. Rang Undang-Undang Suruhanjaya Bebas Aduan Salah Laku Polis 2019 (RUU IPCMC) telah dibacakan untuk kali yang pertama di Dewan Rakyat ini pada 18 Julai 2019 yang lalu oleh pihak Kerajaan.
2. Bacaan kali kedua di Dewan Rakyat telah diadakan pada 7 Oktober 2019 dan seterusnya RUU tersebut telah diserahkan kepada Jawatankuasa Pilihan Khas Menimbang Rang Undang-undang untuk penelitian dan penambahbaikan lanjut.
3. Laporan daripada Jawatankuasa Pilihan Khas Menimbang Rang Undang-Undang bagi RUU IPCMC telah dimuktamadkan dan dibentangkan pada 27 November 2019.
4. Kerajaan kemudiannya pada 3 Disember 2019 telah membawa usul di bawah Peraturan 62, Peraturan-peraturan Majlis Mesyuarat Dewan Rakyat untuk menangguhkan bacaan kali kedua RUU IPCMC ini ke sidang Mesyuarat Pertama, Penggal Ketiga, Parlimen Keempat Belas, 2020. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN [PM 22(5)]

DARIPADA : TUAN KHOO POAY TIONG (KOTA MELAKA)

TARIKH : 4 DISEMBER 2019

SOALAN

TUAN KHOO POAY TIONG (KOTA MELAKA) minta **PERDANA MENTERI** menyatakan perkara-perkara berikut:

- (a) definisi dan kriteria klasifikasi isi rumah miskin tegar, miskin dan terkeluar dalam sistem eKasih; dan
- (b) mengapakah jumlah pendaftaran eKasih setakat Jun 2019 hanya sebanyak 642,550 isi rumah, sedangkan terdapat 2.76 juta isi rumah B40 menurut statistik pendapatan isi rumah 2016.

JAWAPAN

Tuan Yang di-Pertua,

Kerajaan melalui Unit Penyelarasan Pelaksanaan, Jabatan Perdana Menteri (ICU JPM) telah membangunkan Sistem eKasih sebagai satu pangkalan data kemiskinan nasional yang bertujuan untuk mendaftarkan golongan miskin di Malaysia dan mengklasifikasikan kepada kategori Miskin Tegar atau Miskin berdasarkan Pendapatan Garis Kemiskinan (PGK) semasa (tahun 2016) iaitu purata nasional RM980 sebulan. Namun PGK yang ditentukan berbeza-beza mengikut negeri/sama ada di kawasan bandar atau luar bandar dan berdasarkan per kapita (mengikut bilangan ahli isi rumah).

PGK tersebut ditentukan berasaskan perkiraan yang telah disediakan oleh pihak Kementerian Hal Ehwal Ekonomi dan Jabatan Perangkaan Malaysia melalui Penyiasatan Pendapatan Isi Rumah 2016. Hanya terdapat tiga kategori status kemiskinan dalam Sistem eKasih iaitu Miskin Tegar, Miskin dan Terkeluar. Oleh yang demikian, tidak terdapat data B40 (pendapatan RM4,360 sebulan dan ke bawah, tahun 2016) dalam Sistem eKasih.

Takrifan isi rumah Miskin Tegar semasa yang diguna pakai oleh Kerajaan adalah berdasarkan PGK berasaskan makanan. Sekiranya sesebuah isi rumah mempunyai pendapatan bulanan kurang daripada PGK makanan, iaitu pendapatan yang mencukupi bagi membolehkan isi rumah tersebut memenuhi keperluan asas dari segi nutrisi makanan yang minimum yang membolehkan setiap ahlinya mempunyai tubuh badan yang sihat, maka ia dikategorikan isi rumah miskin tegar. Selain itu, sesebuah isi rumah dianggap Miskin sekiranya pendapatan bulanan kurang daripada PGK makanan iaitu pendapatan mencukupi untuk memenuhi keperluan asas dari segi makanan dan bukan makanan. Sesebuah isi rumah yang mempunyai pendapatan melebihi PGK makanan disenaraikan sebagai Terkeluar.

SOALAN NO : 29

Negeri	Miskin (RM)						Miskin Tegar (RM)					
	Bandar		Luar Bandar		Jumlah		Bandar		Luar Bandar		Jumlah	
	Isi Rumah	Per Kapita	Isi Rumah	Per Kapita	Isi Rumah	Per Kapita	Isi Rumah	Per Kapita	Isi Rumah	Per Kapita	Isi Rumah	Per Kapita
Johor	944	245	850	214	923	239	606	154	564	139	597	151
Kedah	872	234	850	210	866	227	558	147	571	139	562	144
Kelantan	935	213	854	188	894	201	662	148	602	130	632	139
Melaka	959	243	867	215	953	241	611	151	569	138	608	150
Negeri Sembilan	874	235	813	228	858	233	562	147	523	142	551	146
Pahang	960	242	889	217	931	232	637	157	608	145	625	152
Pulau Pinang	944	260	993	230	946	258	575	154	628	142	578	154
Perak	839	233	792	211	828	228	558	151	539	140	553	149
Perlis	888	224	879	204	884	216	569	141	603	138	582	140
Selangor	1,038	258	951	223	1,033	256	630	153	626	143	630	153
Terengganu	1,047	229	1,016	217	1,036	225	729	157	704	148	721	154
Sabah	1,154	262	1,215	255	1,176	259	684	150	791	161	723	154
Sarawak	1,068	262	941	244	1,016	255	725	174	618	156	681	167
W.P. Kuala Lumpur	1,069	302	n.a	n.a	1,069	302	601	165	n.a	n.a	601	165
W.P. Labuan	1,154	259	1,281	254	1,168	259	682	150	839	164	699	151
W.P. Putrajaya	1,083	284	n.a	n.a	1,083	284	588	151	n.a	n.a	588	151

Sumber Kementerian Hal Ehwal Ekonomi (MEA)

**PEMBERITAHUAN PERTANYAAN LISAN
DEWAN RAKYAT, MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN RAMLI BIN DATO' MOHD NOR
[CAMERON HIGHLANDS]**

TARIKH : 4 DISEMBER 2019

SOALAN

Minta **PERDANA MENTERI** menyatakan jumlah pelajar Orang Asli yang diterima masuk ke IPTA dan IPTS serta apakah dasar yang digunapakai untuk membantu pelajar-pelajar ini bagi melanjutkan pelajaran mereka.

**JAWAPAN : YB SENATOR TUAN WAYTHA MOORTHY A/L
PONNUSAMY, MENTERI DI JABATAN PERDANA MENTERI**

Tuan Yang di-Pertua,

Menurut rekod statistik Jabatan Kemajuan Orang Asli (JAKOA), jumlah pelajar Orang Asli yang dibantu oleh Kerajaan melalui JAKOA di bawah Skim Bantuan Galakkan Pendidikan (SBGP) yang berjaya melanjutkan pengajian baharu di Institut Pengajian Tinggi Awam (IPTA)/Universiti Awam (UA) dan Institut Pengajian Tinggi Swasta (IPTS) Dalam Negara pada tahun ini adalah seramai 288 orang di IPTA dan seramai 24 orang di IPTS. Untuk makluman, Kerajaan melalui SBGP JAKOA telah membantu mahasiswa/i Orang Asli di IPTA/UA dan IPTS pada tahun ini secara keseluruhannya ialah seramai 821 orang di IPTA/UA dan 87 orang di IPTS.

Antara dasar Kerajaan melalui JAKOA bagi membantu meringankan beban masyarakat Orang Asli dengan membiayai persekolahan dan pengajian anak-anak Orang Asli mulai pra sekolah

sehinggalah ke peringkat pengajian tinggi di IPT adalah telah menggunakan Garis Panduan Skim Bantuan Galakan Pendidikan (SBGP) JAKOA yang berkuat kuasa sejak tahun 2012.

Antara bantuan-bantuan melalui SBGP ini ialah :

- i) Bantuan kepada murid pra sekolah dalam bentuk pembekalan bahan-bahan mentah kering di beberapa buah Tabika Orang Asli pedalaman ;
- ii) Bantuan kepada murid Orang Asli peringkat sekolah rendah kebangsaan dan sekolah menengah kebangsaan seperti wang saku murid sekolah menengah, bayaran yuran pelbagai persekolahan, perkhidmatan catuan makanan pedalaman, keperluan diri murid asrama, dan lain-lain lagi ;
- iii) Bantuan kewangan pendidikan IPT JAKOA kepada mahasiswa/i Orang Asli di IPT yang meliputi yuran pengajian, yuran sara hidup, yuran alatan/buku pengajian, bantuan urusan tiket penerbangan bagi pendaftaran awal pengajian dan tamat pengajian di IPTA/UA Dalam Negara serta elaun makan/minum pelajar IPTS Dalam Negara sahaja.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS DEWAN RAKYAT

PERTANYAAN : LISAN

DARIPADA : DATO' SRI HAJI TAJUDDIN BIN ABDUL RAHMAN
[PASIR SALAK]

TARIKH : 4 DISEMBER 2019 (RABU)

SOALAN

DATO' SRI HAJI TAJUDDIN BIN ABDUL RAHMAN [PASIR SALAK] minta **MENTERI INDUSTRI UTAMA** menyatakan jumlah eksport kelapa sawit dan getah sepanjang tahun 2018 dan 2019 serta pasaran eksport baru kelapa sawit yang telah berjaya diterokai oleh Kerajaan sepanjang tahun 2018 dan 2019.

JAWAPAN:

Tuan Yang di-Pertua,

Jumlah eksport minyak dan produk berasaskan sawit bagi tempoh Januari hingga Ogos 2019 adalah sebanyak 18,680,160 tan, manakala bagi tahun 2018 adalah sebanyak 16,427,390 tan bagi tempoh yang sama yang menunjukkan peningkatan sebanyak 13.71%. Bagi komoditi getah pula, jumlah eksport bagi tempoh Januari hingga Ogos 2019 adalah sebanyak 874,480 tan, manakala bagi tahun 2018 adalah sebanyak 905,750 tan bagi tempoh yang sama yang menunjukkan sedikit penurunan sebanyak 3.58%.

Tuan Yang di-Pertua,

Kementerian sentiasa berusaha meneroka pasaran baharu sebagai salah satu usaha bagi menstabilkan harga komoditi sawit dan getah. Bagi komoditi sawit, pasaran baharu yang telah dikenal pasti bagi tempoh Januari hingga Julai 2019 ialah di Swaziland dengan jumlah eksport 520.02

tan bernilai RM1.66 juta. Manakala pada tahun 2018 pasaran baharu yang telah dikenal pasti adalah Guam di Kepulauan Oceania dan Saint Kitts And Nevis di Kepulauan Caribbean. Jumlah eksport minyak dan produk berasaskan sawit ke kedua-dua pasaran ini adalah masing-masing sebanyak 72.47 tan dengan nilai RM0.21 juta dan 34.38 tan dengan nilai RM0.12 juta.

Selain itu, Armenia di rantau Asia, Luxembourg dan Monaco di Eropah, Tokelau dan Micronesia di Ocenia adalah antara pasaran baharu yang telah diterokai bagi tahun 2019 dengan jumlah eksport sebanyak 31.56 tan atau RM319,662.

Tuan Yang di-Pertua,

Bagi komoditi getah pula, pasaran baharu yang telah dikenal pasti bagi tempoh Januari hingga Julai 2019 ialah di Chad dan Sao Tome And Principe di Afrika, Faroe Island di Eropah, Norfolk Island, Northern Mariana Island dan Palau di Ocenia dan Virgin Island di Amerika Syarikat. Keseluruhan jumlah eksport getah ke pasaran baharu ini berjumlah RM 614,477. Manakala antara pasaran baharu yang telah diteroka pada tahun 2018 ialah di Palestine, Korea, Cape Verde di Afrika dan Tokelau di Ocenia dengan jumlah eksport sebanyak RM1,327,804.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN

**DARIPADA : YB TUAN HASSAN BIN ABDUL KARIM
[PASIR GUDANG]**

TARIKH : 04 DISEMBER 2019 (RABU)

SOALAN

Minta **PERDANA MENTERI** menyatakan adakah tafsiran agama Islam dalam Fasal 3 Perlembagaan Persekutuan hanya merujuk kepada aliran akidah Ahli Sunnah Wal Jamaah sahaja.

JAWAPAN : (YB TIMBALAN MENTERI DI JABATAN PERDANA MENTERI)

Tuan Yang di-Pertua,

1. Untuk makluman Ahli Yang Berhormat, Kerajaan sentiasa komited untuk memastikan agama Islam terus terpelihara dan dipertahan. Perkara 3(1) Perlembagaan Persekutuan telah meletakkan Islam sebagai agama bagi Persekutuan sebagaimana yang berikut :

“Islam ialah agama bagi Persekutuan; tetapi agama-agama lain boleh diamalkan dengan aman dan damai di mana-mana bahagian Persekutuan.”

2. Walaupun Perlembagaan tidak memperincikan dan tidak mendefinisikan secara spesifik aliran akidah yang perlu diikuti oleh orang Islam di Malaysia, namun ia telah diperincikan melalui peruntukan-

peruntukan perundangan negeri-negeri. Hal ini disebabkan agama Islam adalah di bawah bidang kuasa sultan dan negeri seperti mana yang telah ditetapkan dalam Senarai 2, Jadual ke-9 Perlembagaan Persekutuan.

3. Antara Perlembagaan dan undang-undang tubuh negeri yang secara jelas menetapkan bahawa agama Islam di negeri tersebut adalah berdasarkan aliran akidah Ahli Sunnah Wal Jamaah adalah Perlembagaan Negeri Kedah dan Perlis. Perlembagaan negeri-negeri tersebut secara khusus menyatakan bahawa agama Islam beraliran akidah Ahli Sunnah Wal Jamaah adalah agama rasmi negeri dan sultan mesti beraliran akidah tersebut.

4. Selain itu, hampir semua enakmen/akta negeri-negeri mentafsirkan hukum syarak sebagai undang-undang Islam mengikut mana-mana mazhab yang muktabar dalam Ahli Sunnah Wal Jamaah. Sebagai contoh, seksyen 2 Akta Undang-Undang Keluarga Islam (Wilayah-Wilayah Persekutuan) 1984 [Akta 303] memperuntukkan tafsiran Hukum Syarak sebagai Hukum Syarak mengikut Mazhab Shafie, atau mengikut mana-mana satu Mazhab Maliki, Hanafi atau Hanbali.

5. Kedudukan aliran akidah Ahli Sunnah Wal Jamaah di Malaysia turut disokong keputusan Majlis Fatwa Kebangsaan pada 5 Mei 1996 bahawa ia adalah aliran akidah yang diiktiraf dan merangkumi aspek syariah, akhlak dan akidah. Ia turut dikukuhkan dengan fatwa yang dikeluarkan pada tahun 2015 hasil daripada Mesyuarat Jawatankuasa Perundangan Hukum Syarak Wilayah-Wilayah Persekutuan kali ke-90 yang mana memutuskan tentang larangan mengamalkan ajaran yang menyalahi pegangan Ahli Sunnah Wal Jamaah dan larangan mengamalkan ajaran dan amalan fahaman syiah.

6. Selain itu, mahkamah sivil dan syariah di Malaysia juga secara tidak langsung mengiktiraf aliran akidah Ahli Sunnah Wal Jamaah sebagai rujukan dalam kerangka undang-undang di Malaysia. Perkara ini dapat dibuktikan dalam kes *Mustak Ahmed bin Dato' Haji Abdul Rahim Gulam Rasool Shaik v Abdul Wahid bin Dato' Haji Abdul Rahim Gulam Rasool Shaik & Ors* [1987] 2 MLJ 449 yang mana telah memutuskan seperti berikut:

“The laws applicable in our country relating to the Muslim law of succession, gifts, will and the like are the Shariah laws. As enshrined in our Constitution, the official religion of Malaysia is Islam of the Shafie sect from the school of Ahli Sunnah Wal Jamaah (sunnis). ”

7. Dalam kes *Pendakwa lwn. Abd.Talib bin Harun dan Lain-Lain [1995] 10 JH 150*, mahkamah syariah memutuskan hukum syarak yang diamalkan di Johor (dan Malaysia) merujuk kepada mazhab Shafi'i dan tertuduh yang mengaku bermazhab Syiah Imamiah tertakluk dengannya.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS
MAJLIS MESYUARAT DEWAN RAKYAT

PERTANYAAN : LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

TARIKH : 4 DIS 2019 (RABU)

SOALAN

PUAN NURUL IZZAH BINTI ANWAR [PERMATANG PAUH] minta
MENTERI INDUSTRI UTAMA menyatakan :-

- (a) peranan Kementerian memastikan sisa kelapa sawit dimanfaatkan sepenuhnya dalam memastikan kemampanan industri ini; dan
- (b) langkah-langkah penyelesaian dari agensi-agensi seperti MPOB dalam mengatasi masalah penyakit ganoderma yang telah menyebabkan kerugian RM1.5 bilion setahun pada tahun 2011 di negara kita.

JAWAPAN (a)

Tuan Yang Di-Pertua,

Untuk makluman Ahli-Ahli Yang Berhormat, industri sawit negara mengeluarkan lebih kurang 100 juta tan sisa sawit setiap tahun dalam bentuk biojisim pepejal dan cecair yang terdiri daripada tandan kosong, gentian sawit, tempurung sawit, batang sawit, pelepah sawit dan air kumbahan (*palm oil mill effluent* - POME).

Kementerian melalui Lembaga Minyak Sawit Malaysia (MPOB) sedang melaksanakan beberapa strategi bagi memanfaatkan penggunaan biojisim sawit yang juga mampu menjana pendapatan tambahan. Antara teknologi yang telah berjaya dikomersialkan adalah biobahan api pepejal (briket dan pelet), biogas dan bio-CNG daripada POME, bio-komposit (papan gentian berketumpatan sederhana dan papan lapis), bio-baja dan bio-kimia.

Penggunaan bahan biojisim yang boleh diperbaharui dapat mengurangkan kesan pencemaran kepada alam sekitar contohnya:

- i) biobahan api yang dapat digunakan sebagai pengganti sumber bahan api arang batu yang mencemarkan alam sekitar;
- ii) bio-komposit yang dapat digunakan dalam penghasilan produk perabot bagi mengurangkan penebangan pokok-pokok hutan;
- iii) bio-baja yang dapat digunakan sebagai pengganti baja kimia yang mengeluarkan gas rumah hijau; dan
- iv) bio-kimia yang dapat digunakan sebagai pengganti sumber petroleum bagi penghasilan bahan-bahan kimia.

Semua hasil tersebut menunjukkan bahawa sisa kelapa sawit dapat dijadikan produk yang mampan dan mesra alam sekitar. Penggunaan dan pengkomersialan biojisim sawit ini juga boleh menambah pendapatan penggiat industri sawit termasuk perusahaan kecil dan sederhana dan seterusnya meningkatkan pendapatan negara.

JAWAPAN (b)

Tuan Yang Di-Pertua,

MPOB melalui kajian yang dijalankan juga telah menemui beberapa langkah penyelesaian bagi mengatasi penyakit Ganoderma seperti berikut:

SOALAN NO : 35

- i) Mengawal penyakit Ganoderma dengan menggunakan agen kawalan biologi. MPOB telah bekerjasama dengan syarikat swasta untuk mengkomesialkan dua produk kawalan biologi Ganoderma, iaitu biobaja GanoEF yang mengandungi kulat endofitik dan EMBIO acinoPLUS yang mengandungi aktinomiset tanah. Kedua-dua produk ini telah dikeluarkan oleh syarikat tersebut untuk mengawal penyakit Ganoderma di ladang sawit;
- ii) Kawalan penyakit Ganoderma menggunakan racun kimia. Racun kulat hexaconazole digunakan oleh beberapa penanam sawit sebagai kawalan pemulihan ke atas pokok sawit yang diserang penyakit Ganoderma;
- iii) Kawalan penyakit Ganoderma berasaskan bahan tanaman sawit; dan
- iv) Kawalan penyakit Ganoderma berasaskan organik yang diadunkan dengan unsur surih (pembajaan nutrient). Dua jenis produk mengandungi organik dan nutrient bermanfaat untuk kawalan penyakit Ganoderma, iaitu GanoCare organik dan GanoCare OCSpecial telah berjaya dikeluarkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA , PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI HASANUDDIN BIN MOHD
YUNUS**

KAWASAN : HULU LANGAT

TARIKH : 4 DISEMBER 2019 (RABU)

SOALAN NO. 37

Minta PERDANA MENTERI menyatakan berdasarkan suhu politik semasa yang sering dieksploitasi oleh pihak yang tidak bertanggungjawab, perlukah Kerajaan meminda atau memperkukuhkan lagi Akta Rukun Tetangga 2012 (Akta751), khususnya Seksyen 8 (a)-(d) mengenai peranan Mediator Komuniti dalam menyelesaikan masalah sensitif di peringkat akar umbi.

**JAWAPAN : YB SENATOR TUAN WAYTHA MOORTHY A/L
PONNUSAMY, MENTERI DI JABATAN PERDANA MENTERI
(PERPADUAN NEGARA DAN KESEJAHTERAAN SOSIAL)**

Yang di-Pertua,

Adalah menjadi tanggungjawab dan kewajipan sesebuah Kerajaan yang berdaulat untuk menjamin keharmonian rakyatnya. Malaysia sebagai sebuah negara dengan masyarakatnya yang terdiri daripada kepelbagaian kaum, agama, budaya dan bahasa tidak terlepas berhadapan dengan insiden-insiden yang boleh menggugat perpaduan dan keharmonian negara.

Jabatan Perpaduan Negara dan Integrasi Nasional (PERPADUAN) sedia maklum bahawa dalam usaha untuk memupuk perpaduan dan

keharmonian masyarakat, kita perlu menangani perselisihan faham yang kadang kala berlaku di antara satu sama lain supaya mengelakkan daripada tercetusnya ketegangan atau kejadian yang lebih serius sehingga boleh mengakibatkan rusuhan kaum.

Maka pendekatan perdamaian diperkenalkan melalui proses mediasi komuniti. Mediator Komuniti (MK) merupakan pihak ketiga yang berkecuali yang akan berusaha mencari jalan perdamaian di antara pihak-pihak yang bertelagah atau berkonflik. MK ini terdiri daripada pemimpin-pemimpin KRT dan pegawai-pegawai kerajaan yang dilatih khas untuk membantu menyelesaikan pertikaian atau konflik di peringkat akar umbi dan sekaligus memupuk keharmonian dalam kalangan masyarakat.

Justeru, Kerajaan sememangnya berhasrat untuk memantapkan jentera akar umbi di dalam memupuk perpaduan dan keharmonian masyarakat pelbagai kaum di negara ini melalui pindaan kepada Akta Rukun Tetangga 2012 atau Akta 751 sedia ada. Pindaan bertujuan untuk memperkasakan pengurusan Rukun Tetangga (RT), pelaksanaan Skim Rondaan Sukarela (SRS) dan juga pelaksanaan Mediator Komuniti (MK) di seluruh negara. Sehingga 30 September 2019, seramai 1,130 orang MK telah berjaya ditauliahkan oleh PERPADUAN.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HALIMAH BINTI MOHAMED
SADIQUE [KOTA TINGGI]**

TARIKH : 4 DISEMBER 2019 [RABU]

SOALAN

Minta **MENTERI HAL EHWAL EKONOMI** menyatakan apakah insentif terbaru bagi memastikan kesinambungan generasi peneroka agar tanah yang diusahakan oleh peneroka asal diteruskan oleh generasi akan datang.

JAWAPAN

Tuan Yang di-Pertua,

1. Untuk makluman Ahli Yang Berhormat, Kerajaan telah memperuntukkan sebanyak RM6.23 bilion dalam bentuk geran, pinjaman dan jaminan Kerajaan secara berperingkat kepada FELDA bagi melaksanakan inisiatif yang telah digariskan di dalam Kertas Putih FELDA. Sejumlah RM1.0 bilion daripada jumlah tersebut telah diperuntukkan bagi Program Pembangunan Peneroka (PPP) untuk tempoh empat (4) tahun. PPP merupakan inisiatif yang dirangka bagi membolehkan peneroka dan generasi baharu untuk menjana pendapatan melalui diversifikasi tanaman.

2. Di samping itu, kaedah pengurusan ladang akan diperbaharui melalui penglibatan aktif koperasi peneroka di setiap Rancangan FELDA. Pengurusan ladang peneroka oleh koperasi yang diterajui oleh generasi

baharu mampu meningkatkan kecekapan pengurusan ladang dan mengurangkan kos operasi. Program ini secara langsung dapat memperkasa generasi baharu disamping menyumbang kepada pembangunan ekonomi di Rancangan FELDA.

3. Selain itu, FELDA juga melaksanakan beberapa program bagi menambah baik prosedur pewarisan dalam memastikan peralihan yang lebih lancar seperti berikut:

(i) Program Pengemaskinian Data Pemilikan Tanah Peneroka

Program ini akan memuktamadkan maklumat pewarisan. Sebagai projek rintis, FELDA telah selesai mengemaskini data pemilikan tanah peneroka di FELDA Mempaga 3, Kg. Sertik dan Lurah Bilut. Usaha ini seterusnya akan diperluas ke rancangan FELDA yang lain.

(ii) Program dan Kempen Kesedaran Mengenai Pewarisan

Program dan kempen ini diharap dapat menggalakkan waris peneroka membuat permohonan bicara kuasa bagi memastikan hanya waris yang hak menguruskan tanah peninggalan peneroka asal tersebut.

(iii) Program Pemantapan Pengurusan Pewarisan

Program ini akan melibatkan petugas FELDA di semua 11 Wilayah FELDA. Inisiatif ini bertujuan untuk meningkatkan kefahaman petugas FELDA bagi membantu dalam melancarkan proses penyelarasan permohonan bicara kuasa bersama pewaris dan pihak berkuasa negeri.

4. Program yang dilaksana ini diharap dapat memastikan proses peralihan pemilikan tanah berjalan lancar dan memastikan generasi baharu peneroka dapat mengusahakan tanah yang ditinggalkan oleh peneroka asal. Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : YB TUAN AWANG HUSAINI BIN SAHARI
[PUTATAN]**

TARIKH : 04 DISEMBER 2019

SOALAN

Minta **MENTERI SUMBER MANUSIA** menyatakan apakah langkah Kerajaan untuk mengatasi kebimbangan yang disuarakan oleh Kesatuan Kebangsaan Pekerja-Pekerja Bank (NUBE) berkenaan kemungkinan berlakunya lambakan pengangguran akibat daripada pendigitalan sistem perbankan "(E-Banking)". Kemajuan automasi dan pendigitalan sistem perbankan tidak seharusnya melenyapkan kehidupan pekerja demi membolehkan sesebuah negara berkembang maju.

JAWAPAN

Tuan Yang di-Pertua,

1. Bilangan pekerja yang diberhentikan kerja pada tahun ini (sehingga September 2019) adalah seramai 24,600 orang pekerja. Daripada jumlah ini seramai 1,748 pekerja (7.1%) adalah pekerja daripada sektor kewangan dan insuran/takaful.

2. Kementerian ini melalui Jabatan Tenaga Kerja (JTK) sentiasa memantau aktiviti pemberhentian kerja dan memberi khidmat nasihat kepada majikan-majikan yang melaksanakan aktiviti ini untuk membayar apa-apa bayaran kepada pekerja mengikut Akta Kerja

SOALAN NO: 39

1955 (Akta 265), atau mengikut terma dalam kontrak perkhidmatan serta apa yang telah dipersetujui dalam Perjanjian Bersama.

3. Sekiranya majikan gagal membayar bayaran-bayaran ini, para pekerja yang terlibat dinasihatkan untuk memfailkan tuntutan mereka di Mahkamah Buruh, Jabatan Tenaga Kerja yang terdekat.

4. Di samping itu, Kementerian ini melalui JTK membantu bekas-bekas pekerja ini peroleh pekerjaan yang lain dengan memperlawakan mereka untuk hadir ke aktiviti-aktiviti Program Penempatan Pekerjaan (3P) yang dilaksanakan oleh *JobsMalaysia* di seluruh negara. Sehingga September 2019 seramai 255 orang pekerja yang diberhentikan kerja memperoleh pekerjaan di karnival-karnival pekerjaan yang telah diadakan.

Tuan Yang di-Pertua,

5. Kerajaan juga telah menguatkuasakan Akta Sistem Insurans Pekerjaan 2017 (Akta 800) mulai 1 Januari 2018 dan bagi pekerja yang kehilangan pekerjaan mulai 1 Disember 2018, serta mencukupi caruman sebanyak 12 bulan caruman, mereka adalah layak untuk menuntut faedah penuh Sistem Insurans Pekerjaan (SIP) (*full-fledge*).

6. Sehubungan itu, mana-mana pekerja termasuk pekerja bank sekiranya diberhentikan kerja dan memenuhi syarat tersebut adalah layak untuk menerima faedah Sistem Insurans Pekerjaan. Bagi tempoh Januari sehingga Oktober 2019 seramai 591 permohonan SIP dari kalangan pekerja sektor perbankan telah diterima dan dari jumlah tersebut, seramai 480 orang berinsurans telah menerima bayaran faedah sebanyak RM 948,361.28.

7. Di samping itu, bagi tempoh Januari 2019 hingga 22 November 2019 seramai 353 orang penerima faedah SIP dari kalangan pekerja bank terbabit telah berjaya kembali semula bekerja di bawah program perkhidmatan pekerjaan PERKESO

SOALAN NO: 39

8. Selain daripada itu, PERKESO juga turut menyediakan perkhidmatan pekerjaan dan kaunseling kerjaya, yang mana ianya berperanan untuk membantu pekerja-pekerja yang diberhentikan untuk mendapatkan pekerjaan yang bersesuaian. Perkhidmatan pekerjaan ini juga turut diberikan kepada pekerja yang mencarum di bawah SIP dan tidak memenuhi syarat kelayakan caruman.

Tuan Yang di-Pertua,

9. Dalam usaha melatih semula pekerja yang kehilangan pekerjaan, Kementerian ini melalui Jabatan Tenaga Manusia mengambil inisiatif menawarkan pelbagai program latihan kemahiran menerusi Kursus Jangka Pendek di 32 buah Institusi Latihan Jabatan Tenaga Manusia (ILJTM) seluruh negara. Kursus jangka pendek ini dilaksanakan sepanjang tahun dan waktu pelaksanaannya adalah fleksibel bermula dari jam 8.00 pagi hingga 11.00 malam. Kursus yang ditawarkan agar ia selari dengan keperluan teknologi semasa dan relevan yang diperlukan oleh para majikan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK MOHAMAD ABDUH BIN NIK
ABDUL AZIZ [BACHOK]**

TARIKH : 4 DISEMBER 2019 (RABU)

SOALAN

Minta **MENTERI HAL EHWAL EKONOMI** menyatakan status pembayaran royalti pada tahun 2019 kepada negeri Kelantan.

JAWAPAN

Tuan Yang di-Pertua,

1. Sebagaimana Ahli Yang Berhormat sedia maklum, Kerajaan Negeri Kelantan secara rasminya telah menarik balik kes tuntutan pembayaran tunai atau royalti petroleum di Mahkamah Tinggi Kuala Lumpur ke atas Petroliam Nasional Berhad (PETRONAS) sebagai Defendan Pertama (1) pada 21 Mei 2019 dan Kerajaan Persekutuan Malaysia sebagai Defenden Kedua (2) pada 27 Jun 2019 lalu.
2. Susulan penarikan balik saman oleh Kerajaan Kelantan kepada Kerajaan Persekutuan, Kementerian Hal Ehwal Ekonomi (MEA) menerima satu Notis Pemberhentian Kes secara rasmi daripada pihak Jabatan Peguam Negara (AGC) melalui Penasihat Undang-undang MEA pada 5 Jun 2019.
3. Berdasarkan makluman rasmi penarikan tersebut, Kerajaan Persekutuan telah mengambil langkah susulan supaya perkara berkaitan pembayaran tunai atau lebih dikenali sebagai royalti minyak untuk Kerajaan Negeri Kelantan dapat diselesaikan dengan segera.

4. Hasil semakan Kementerian ini dengan PETRONAS mendapati bahawa pembayaran bagi Ogos 2019 sejumlah RM16.79 juta telahpun dilunaskan oleh PETRONAS kepada Kementerian Kewangan untuk maksud ini. Pihak Kementerian Kewangan menyalurkan sebanyak 50 peratus daripada bayaran tunai kepada Kerajaan Negeri Kelantan manakala 50 peratus lagi disalurkan kepada Majlis Agama Islam dan Adat Istiadat Melayu Kelantan (MAIK).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN CHOW KON YEOW
[TANJONG]**

TARIKH : 4 DISEMBER 2019 [RABU]

SOALAN NO.41

Minta **MENTERI AIR, TANAH DAN SUMBER ASLI** menyatakan perkembangan kelulusan Mekanisme Penetapan Tarif (TSM). Bilakah ia akan dibentangkan dan tempoh masa Kerajaan Pusat akan menyelaraskan tarif air melibatkan semua negeri. Berhubung rundingan atau pelaksanaan Skim Bekalan Air Mentah dari Sungai Perak (SPRWS), adakah Fasa 1 akan siap menjelang tahun 2025. Jika tidak, nyatakan kenapa.

JAWAPAN

Tuan Yang di-Pertua,

1. Dari segi perkembangan ke arah melaksanakan Mekanisme Penetapan Tarif Air (*Tariff Setting Mechanism*) atau ringkasnya TSM, saya ingin memaklumkan bahawa sesi konsultasi dengan operator air, kerajaan-kerajaan negeri serta wakil pengguna telah dilaksanakan melalui Suruhanjaya Perkhidmatan Air Negara (SPAN). Cadangan ini selanjutnya akan dikemukakan untuk pertimbangan Jemaah Menteri dalam masa terdekat. Pelarasan tarif bagi setiap negeri akan dilaksanakan setelah kelulusan Jemaah Menteri diperoleh.

Tuan Yang di-Pertua,

2. Berhubung pelaksanaan Skim Bekalan Air Mentah dari Sungai Perak (SPRWS), Kerajaan Negeri Pulau Pinang pada 22 Januari 2019 secara prinsipnya telah bersetuju dengan pendirian Kerajaan Negeri Perak untuk membekalkan air terawat dan kedua-dua negeri akan berunding mengenai pembinaan loji rawatan air secara usaha-sama.
3. Walau bagaimanapun, pendirian Kerajaan Pulau Pinang ini telah berubah dan telah dizahirkan dalam mesyuarat pelaksanaan SPRWS pada 20 September 2019. Kerajaan Negeri Pulau Pinang pada masa ini hanya berhasrat untuk membeli bekalan air mentah manakala Kerajaan Negeri Perak masih tetap dengan pendirian untuk menjual air terawat.

NO. SOALAN : 41

4. Kesiapan pelaksanaan SPRWS Fasa 1 menjelang tahun 2025 adalah bergantung kepada keputusan yang dirundingkan di antara kedua-dua Kerajaan Negeri Perak dan Kerajaan Negeri Pulau Pinang. Kerajaan Persekutuan berpendirian pelaksanaan penyaluran air ini perlu dipersetujui oleh kedua-dua Kerajaan Negeri memandangkan pengurusan dan hal-hal yang berkaitan sumber air adalah terletak di bawah hak dan kuasa Kerajaan Negeri.
5. Lanjutan daripada mesyuarat yang telah diadakan pada 20 September 2019 tersebut, pihak Kementerian akan mengatur satu mesyuarat yang akan dipengerusikan oleh YB Menteri KATS melibatkan YAB Menteri Besar Perak dan YAB Ketua Menteri Pulau Pinang bagi mendapatkan keputusan dasar mengenai kaedah penyaluran air iaitu sama ada air mentah atau air terawat kepada Pulau Pinang.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS
MAJLIS MESYUARAT DEWAN RAKYAT

PERTANYAAN : LISAN

DARIPADA : DATO' NGEH KOO HAM [BERUAS]

TARIKH : 4 DISEMBER 2019 (RABU)

SOALAN

DATO' NGEH KOO HAM [BERUAS] minta **MENTERI INDUSTRI UTAMA** menyatakan kadar cukai yang dikenakan oleh negara-negara pembeli atas minyak kelapa sawit Malaysia. Adakah cukai yang sama dikenakan kepada negara-negara pengeksport minyak kelapa sawit yang lain.

JAWAPAN

Tuan Yang Di-Pertua,

Untuk makluman Ahli-Ahli Yang Berhormat, kadar cukai import yang dikenakan oleh negara-negara pembeli ke atas minyak kelapa sawit Malaysia boleh dibahagikan kepada 3 kategori:

- i. *Most Favoured Nation* (MFN) diguna pakai oleh kebanyakan negara di dunia;
- ii. *Asean Harmonised Tariff Nomenclature* (AHTN) diguna dikalangan negara-negara anggota ASEAN, iaitu mengikut kadar cukai import dibawah *Asean Trade in Goods Agreement* (ATIGA); dan
- iii. *Preferential Rate / Tariff* digunakan di negara-negara yang telah menandatangani perjanjian Perdagangan Bebas atau *Free Trade*

SOALAN NO : 42

Agreement (FTA) dengan Malaysia samada secara dua hala atau diperingkat serantau melalui ASEAN.

Negara pengekспорт minyak sawit yang lain seperti Indonesia dan Thailand juga dikenakan cukai import melalui kaedah yang sama seperti di atas. Namun, kadar *Preferential Rate / Tariff* yang dikenakan adalah berlainan mengikut Perjanjian Perdagangan Bebas (FTA) yang telah dimeterai antara negara pengekспорт tersebut dengan negara rakan dagang yang terbabit.

Sekian, terima kasih.